

元史新編

元史卷十四

有阿爾斯蘭者舉國來降太祖封爲郡王俾領其部族明宗北狩過之納其女罕祿魯氏以延祐七年四月丙寅生帝于北方文宗至順元年明宗后八不沙遇害乃以帝乳母夫言明宗在日素謂長子非己子命翰林書其事於史館遂徙之高麗令居大靑島中不與人接閱一載復召奎章閣學士虞集使書詔播告中外再移帝于廣西之靜江三年八月文宗崩燕帖木爾請立文宗子燕帖古思文后不從乃立帝弟懿璘質班在位二月殂燕帖木爾復請立燕帖古思后曰吾子尙幼當大福恐不任妥懽帖睦爾在

廣西今年十三矣且明宗長子義當立命中書右丞闊里吉思迎帝于靜江至良鄉具鹵簿迓之燕帖木爾既見帝竝轡徐行具陳所以迎立意帝幼且畏之一無所咎燕帖木爾以帝意難測尼之適太史亦言帝不可立立則天下亂以故議未決遷延者數月國事皆決于燕帖木爾啟中宮取進止俄而燕帖木爾死后乃與大臣定議立帝且與帝約曰萬歲後其傳位於燕帖古思若武仁故事癸酉夏六月己巳帝卽位於上都詔赦天下辛未命柏顏爲太師右丞相仍設左丞相以太傅撒敦爲之命諸官不得兼領三職秋七月己亥太陰犯房八月壬申立燕帖木爾女伯牙吾氏爲皇后詔官員自省院臺外不許遞升致礙選法九月甲午太陰犯填星乙未犯天江己未犯氐冬十月甲

子太陰犯斗戊辰詔改至順四年爲元統元年癸酉雲南
傀儡羅土官渾鄧馬弄來貢升其地爲散府丁丑依皇太后
行年之數釋罪囚二十七人庚辰奉天厯皇帝及太皇太
后御容於大承天護聖寺命撒敦兼隆祥院使主奉祀戊
子封撒敦爲榮王唐其勢襲父封太平王十一月辛卯朔
罷富州金課甲午太陰犯壘壁陣辛亥復立江西湖廣江
浙河南榷茶運司志云其種有末茶有葉茶按茶之爲用始於唐皆以細末製爲餅臨用而碾之其後葉茶之行始盛上天厯皇帝尊諡曰聖明元孝皇帝廟號文宗
文宗紀作下年事時寢廟未建暫於英宗室次結綵殿奉安神主
封柏顏爲秦王是日秦州山崩地裂夜太陰犯太微東垣
上相壬子犯填星癸丑犯亢罷河閒大報恩寺諸色人匠
總管府十二月乙丑廣西猺寇湖南道州千戶郭震戰死

癸酉太陰犯鬼乙亥爲皇太后置徽政院設官三百六十
六員是夜太白犯壘壁陣太陰犯軒轅己卯犯進賢癸未
犯東咸是歲廷試進士增及百人左右榜各三人同同李
齊等皆賜進士及第科舉取士莫盛于斯

元統二年甲戌春正月庚寅朔雨血于汴梁著衣皆赤辛
卯以脫別台平章政事戊戌四川大盤洞蠻謀谷什用來
貢卽其地立盤順府是夜太陰犯軒轅庚戌犯房甲寅罷
廣教總管府立行宣政院于杭州二月己未朔詔內外興
舉學校戊辰封耶眞耶不干爲昌寧王以陰陽家言停造
作四年癸酉太陰犯太微東垣上相太廟木陛壞丁亥太
白經天三月己丑朔詔科舉取士國子學積分膳學錢糧
儒人免役悉依累朝舊制學校官選有德者補充辛卯太

陰犯填星癸巳廣西徭賊復起殺元帥掠庫物遣右丞圖魯迷失將兵討之罷廣設司復立覆寶司癸卯月食旣益都真定盜起選省院官往捕之募能禽盜者倍其賞獲三人者與一官壬子廣西慶遠徭賊寇全州丁巳詔蒙古色目人犯奸盜詐僞者隸宗正府漢人南人犯者屬有司夏四月戊午朔日食壬申命唐其勢爲御史大夫丁丑太白經天戊寅太白晝見己卯奉文宗神主升祔因有事于太廟躬行告祭樂用宮縣禮三獻壬午太白晝見錄許衡後以其孫從宗爲異珍庫提點癸未立鹽局于京師官自賣鹽敕除累朝期年忌日外不作佛事禁私刦寺觀庵院僧道入錢五十貫給度牒方聽出家五月己丑宦者孛羅帖木爾傳皇后旨取鹽十萬引入中政院戊申封宗室蠻子

爲文濟王鎮大名雲南王阿魯鎮雲南詔王侯宗戚軍站人匠鷹房控鶴但隸京師諸縣者令一體應役贈故中書

平章王泰亨諡清憲

舊制三品以上官立朝有大節者得賜功臣號及諡時寢亢濫失實惟泰

亨在中書時安南請佛書以九經賜之使高麗不受禮遺爲尙書貧不能自給故特賜是諡秋七月甲

午太白晝見己亥太白經天壬寅詔蒙古色目人仍行父母喪犯盜者免刺甲辰太白經天帝幸柙木亭己酉太白晝見夜有流星大如杯色赤長五尺餘光燭地起自天津沒於離宮之南庚戌太白經天壬子熒惑犯鬼八月丙辰朔太白經天凡四日戊午祭社稷自是復舉癸亥太白經天辛未以災變赦天下京師地震雞鳴山崩陷爲池方百里己卯太白犯軒轅九月庚寅太白經天壬辰太陰入南斗癸巳太白犯靈臺甲午猺賊陷賀州命廣西宣慰使章

伯顏帥八番義從軍擊之壬子太白犯太微垣冬十月乙卯朔定內外官朝會儀班次一依品從辛酉以許有壬參知政事癸亥太白犯太微東垣上相復犯進賢丁卯立湖廣黎兵屯田萬戶府統千戶十三所增置武安縣乙亥太陰犯軒轅太白犯填星己卯上皇太后尊號曰贊天開聖仁壽徽懿昭宣皇太后大赦天下免今年田租之半內外官四品以下減一資癸未定眞葛皇后配饗武宗是爲宣慈惠聖皇后十一月戊子發兩艘船下番爲皇后營利乙未填星犯亢庚戌熒惑犯太微垣是歲河南湖北旱自三月不雨至于八月淮水灤河漆河溫江浙大饑振米六萬石鈔二千八百錠罷太廟夏秋二享

至元元年乙亥春二月甲寅朔帝將田柳林從臺臣諫遂

止丁巳立縹甸散府及穆由甸范陵甸二長官司甲戌熒惑逆行入太微三月癸未朔遣五府官決天下重囚敕丞相已領軍國重事省院臺官俱不得兼領各衛貴州平伐都雲定雲蠻長寶郎天都蟲等來降卽其地立宣撫司丙申以甘州路十字寺奉安世祖皇帝母別吉太后於內議定祭禮別吉應是莊聖太后別號丁酉月食罷采高麗媵女甲辰免山東河閒兩淮福建新增鹽課十八萬五千引以徹里帖木爾平章政事王結參知政事夏四月癸丑朔廢霑益州所轄羅山石梁交水三縣詔諸官非節制軍馬者不得佩金虎符壬戌太陰犯左執法己卯命翰林國史院纂修累朝實錄及后妃功臣列傳庚辰罷功德典瑞營繕集慶翊正羣玉繕工金玉珠翠諸提舉司五月壬午朔遣使祭曲阜

孔子廟癸卯太陰犯壘壁陣甲辰命唐其勢爲左丞相

時撤

敦已死

六月壬戌太陰犯心庚辰唐其勢憤柏顏專政謀立

諸王晃火帖木爾伏兵東郊率勇士突入宮柏顏執之及其弟塔刺海皆伏誅并執皇后伯牙吾氏幽之別所秋七月辛巳朔以馬札爾台阿察赤爲御史大夫壬午柏顏弑皇后伯牙吾氏于開平民舍諸王晃火帖木爾自殺乙未太陰犯壘壁陣壬寅專命柏顏爲右丞相罷左丞相不置戊申誅荅里及阿察赤等于市詔曰曩者文宗皇帝以燕帖木爾嘗有勞伐父子兄弟顯列朝廷而輒造事釁出朕遠方文皇尋悟其妄遺命傳位於朕燕帖木爾貪立幼弱復立朕弟不幸早殂丞相柏顏追奉遺詔迎朕於南旣至大都燕帖木爾猶懷兩端遷延數月天隕厥躬諸臣翊戴

乃正宸極後撒敦荅里唐其勢相襲用事交通宗王晃火帖木爾圖危社稷阿察赤亦嘗與謀今幸以次掩捕明正其罪元凶構難貽我太后震驚朕用兢惕永惟皇太后後其所生之子一以至公爲心親挈大寶畀予兄弟迹其定策兩朝功德隆盛近古罕比雖嘗奉上尊號朕心猶爲未盡已命大臣特議加禮柏顏立勲兩朝茲又克清大憝明飭國憲爰賜荅刺罕之號期於子孫世世永賴八月辛亥朔熒惑犯氏癸亥以淇陽王完者帖木爾知樞密院事帖木爾不花竝爲御史大夫己卯議尊皇太后爲太皇太后許有壬諫以爲非禮不聽九月丁亥封闊里吉思爲宣國公定住爲宣德王是夜太陰犯斗庚寅犯壘壁陣丙午改烏撒烏蒙地仍隸四川冬十月甲寅熒惑犯南斗丙辰加

塔失海牙太尉商議中書省事塔失帖木爾爲大禧院使
議軍國重事丁巳安置御史大夫完者帖木爾于廣海甲
子太陰犯昴丁卯犯斗戊辰太白晝見徹里帖木爾議罷
科舉并減太廟四祭爲一御史呂思誠等十九人劾其變
亂舊章不聽皆辭去惟陳允文不署名獨畱十一月庚辰
詔罷科舉以所在儒學貢士莊田租給宿衛衣糧甲申太
白經天乙酉敕內外官悉循資銓注毋得保舉澀滯選法
丙戌太白經天己丑辰星犯房丁酉以阿吉刺平章政事
徐奭定住竝參議中書省事戊戌召前知樞密院事福丁
失刺不花撒爾不哥還京師初二人以帝未立謀誅燕帖木爾爲所誣貶故召之己
亥太陰犯太微垣庚子犯左執法辛丑以災異改元詔曰
仰惟世祖在位長久天人協和諸福咸至祖述之志良切

元史卷十四

本紀

六

朕懷今特改元統三年仍爲至元元年十二月壬子太陰犯壘壁陣壬戌命四川雲南保舉蠻夷官以俟銓注乙卯加上皇太后尊號曰貞文慈佑儲善衍慶福元太皇太后是夜太白犯軒轅夫人星丙寅太白經天丁卯太陰犯右執法癸酉歲星晝見乙亥太白歲星皆晝見丙子安慶斬黃地震戊寅蒙古國子監成閏月乙酉詔四川鹽運司仍于鹽井造鹽餘井聽民煮造收其課十之二熒惑犯壘壁陣壬辰命宗室脫脫木爾襲封荆王掌忙來諸軍戊戌徹里帖木爾以罪罷流南安庚子太陰犯心壬寅犯箕癸卯犯南斗是歲賜天下田租之半凡有妻室之僧令還俗旣而復聽爲僧太廟惟舉夏秋二享

二年丙子春正月壬戌太陰犯右執法甲子犯角丁卯犯

房宿松縣地震山裂置都水庸田司于平江二月辛巳太陰犯昴甲申太白經天丁酉追尊帝生母罕祿魯氏爲貞裕徽聖皇后庚子析衡陽立新城縣乙巳免甘肅兵在逃者罪聽復業三月壬戌太陰犯心甲子犯箕乙丑犯南斗甲戌復四川鹽井之禁夏四月丁丑朔禁民間私造格例戊寅封駙馬李羅帖木爾爲毓德王丙戌太陰犯角丁亥禁服麒麟鸞鳳白兔靈芝雙角五爪龍八龍九龍萬壽福壽字赭黃等服庚寅以帖木爾不華平章政事王德懋爲中書左丞撒迪爲御史大夫五月丙午朔黃河復故道庚戌太陰犯靈臺丙辰太白晝見壬申秦州山崩六月戊子太白犯井禮部侍郎忽里台請復科舉之制不聽湍河白河涇水皆溢秋七月己酉太白犯鬼庚戌以定住鎖南參

議中書省事乙卯太白犯熒惑禁口傳敕旨濫支錢帛癸酉命駙馬月魯不花帖古思教化同鎮薛連可怯魯連之地八月甲戌朔日食己卯太陰犯心辛巳犯箕壬辰立屯衛于馬札罕之地庚子定強盜皆死盜牛馬者劓盜驢騾者黥額再犯劓盜羊豕者墨項再犯黥三犯劓劓後再犯者死盜諸物者照其數估價省院臺五府官三年一次審決辛丑并馬湖路泥溪平夷蠻夷都沐川雷坡六長官司爲三九月庚戌熒惑犯太微垣冬十月丙子熒惑犯左執法丁酉太陰犯昴己亥犯進賢詔每日右丞相柏顏太保定住平章孛羅阿吉刺聚議于內廷平章塔失海牙右丞鞏卜班參知政事納麟許有壬聚議于中書十一月己酉太陰犯壘壁陣丁巳遣河南平章珙璐不花至西番爲

僧安置宗王不蘭奚于梧州丁卯太陰犯房辛未禁彈弓
弩箭袖箭是歲以燕帖木爾居第賜灌頂國師號大覺海
寺塑千佛于其內江浙旱自春至于八月不雨黃州蝗督
民捕之人日五斗太廟惟舉冬享

三年丁丑春正月癸卯廣東增城縣民朱光卿反僞稱大
金國改元赤符癸丑立宣鎮侍衛屯田萬戶府于寧夏丙
辰月食丁巳日有交暈左右珥上有白虹貫之戊午帝畋
于柳林凡三十五日監察御史丑的宋紹明進諫帝嘉之
賜金幣丑的等固辭帝曰昔魏徵進諫唐太宗未嘗不賞
汝其受之封晉郭璞爲靈應侯諡唐杜甫曰文貞二月壬
申朔日食河南汝寧人胡閏兒號棒以燒香惑眾反于信
陽州破鹿邑焚陳州屯營于杏岡丙子立船戶提舉司定

船戶科差千料以上者歲納鈔六錠下此遞減復立采珠

提舉司三月辛亥太陰犯靈臺戊午立弘吉刺氏爲皇后

因雨輟賀癸亥加封晉周處爲英義武惠正應王是月天

雨線雨毛如線而緣民謠曰天雨線民起怨中原地事必變夏四月癸酉禁漢人南

人高麗人持軍器有馬者拘入官甲戌有星孛于王良至

七月壬寅没于貫索辛卯太陰犯壘壁陣四川大足縣民

韓法師反自稱南朝趙王廣東歸善縣民聶秀卿譚景山

等造軍器拜戴甲爲定光佛與朱光卿相結爲亂庚子太

白晝見詔省院臺部宣慰廉訪司及郡府幕官之長竝用

蒙古色目人禁漢人南人習蒙古色目文字五月辛丑民

閒譎言朝廷采童男女一時嫁娶殆盡壬寅太白犯鬼乙

巳太陰犯軒轅戊申太白晝見壬子太陰犯心甲寅西番

賊起殺鎮西王子黨元班詔立行宣政院以耶先帖木爾
爲院使討之戊午太白晝見己未太陰犯壘壁陣丁卯彗
星見東北大如天船星色白長尺餘彗指西南凡六十三
日自昴至房歷十五宿始滅六月庚午太白經天乙亥太
白犯靈臺己卯犯太微垣御河黃河漳河泌河渾河水竝
溢壬午太白晝見太陰犯斗丁亥太白犯太微垣戊子加
封尹真人爲無上太初博文文始真君徐甲爲垂玄感聖
慈化應御真君庚桑子爲洞靈感化超蹈混然真君文子
通玄光暘昇元敏秀真君列子冲虛至德遁世樂游真君
莊子南華至極雄文弘道真君己丑太白晝見閱三十三
日方息秋七月丁未車駕幸龍岡灑馬湏以祭庚申詔除
死罪重情必候五府官審錄笞杖以下聽有司依例決斷

是月朱光卿就禽八月甲戌太陰犯心壬午京師地大震太廟梁柱裂各室牆壁壞壓損儀物及文宗神主御牀各寺神御殿壁仆損祭器自是累震者六日癸未弛高麗軍器禁仍令乘馬凡漢人鎮遏生番處竝開軍器禁九月己亥熒惑犯斗甲辰太白犯斗丁未太陰犯壘壁陣己酉修文宗神主玉冊及神御物成遣官告祭辛亥太陰犯軒轅冬十月庚午太白晝見丙子太陰犯壘壁陣壬午犯昴丁亥犯鬼庚寅太白晝見十一月丁酉太白經天戊戌太白犯亢壬寅太陰犯熒惑癸卯犯壘壁陣丙午立屯田于雄州丁未填星犯鍵閉辛亥太白犯五車甲寅犯鬼丙辰太陰犯軒轅丁巳犯太微垣癸亥發鈔萬五千錠振宣德地震死傷者十二月己巳歲星退犯天罈填星犯罰星甲戌

熒惑犯壘壁陣太白犯東咸壬午集賢大學士羊歸言太
上皇唐妃影堂在眞定玉華宮太上皇者睿宗也唐妃無攷每年宐于
正月二十日致祭從之加馬札爾台太保知樞密院鎮北
邊柏顏請殺張王劉李趙五姓漢人帝不從是年太廟四
祭皆闕

四年戊寅春正月丙申以地震赦天下詔內外廉能官父
母年七十無侍丁者準附近銓注以便侍養癸卯太白犯
建星丙午犯五車辛亥太陰犯軒轅己未填星犯東咸庚
申太陰入南斗太白犯牛二月戊寅太陰犯軒轅己卯犯
靈臺乙酉奉聖州地震三月戊申填星退犯東咸夏四月
辛未京師雨紅沙晝晦以探馬赤只爾瓦台平章政事脫
脫爲御史大夫己卯河南執胡閏兒械至京誅之癸巳帝

如上都暮至八里塘雨雹大如拳其狀有小兒環玦師象
龜卵之形五月辛酉詔吐蕃宣慰司軍士許乘馬執兵器
分湖廣元領新化古州潭溪龍里洪州諸洞民六萬餘戶
隸靖州增吏部攷功司官以佛家閭爲郎中喬林爲員外
郎魏宗道爲主事攷較天下郡縣官功過六月庚午袁州
民周子旺反僞改年號尋被禽伏誅辛巳填星退犯鍵閉
壬午立重慶路墊江縣漳州民李志甫反圍漳城守將擗
思監戰失利秋八月癸亥朔日食丙子京師地震日二三
次至乙酉乃止丁丑白虹亙天癸未改宣德府爲順寧府
奉聖州爲保安州雲南老告土官八那遣使齎象馬來朝
立老告軍民總管府閏月己亥填星犯罰星庚戌太陰犯
斗乙卯犯鬼贈湖廣平章燕赤永平王諡忠襄伯顏察爾

奉元王諡忠宣太保曲出廣陽王諡忠惠平章伯帖木爾
文安王諡忠憲闊爾吉思晉寧王諡忠襄九月丙寅太陰
犯斗戊辰太白犯東咸癸酉奔星如杯大色白起右旗下
西南行没于近濁甲申太陰犯軒轅乙酉犯靈臺庚寅太
白犯斗冬十月辛亥太陰犯酒旗十一月丁卯立紹熙府
軍民宣撫都總司本府元領六州二十縣一百五十二鎮
元初以其地荒而廢之至是居民多至
二十餘萬故己巳熒惑犯氐丁丑太陰犯鬼戊寅犯壘壁
立府治之
陣十二月戊戌立邦身等處宣慰司都元帥府并總管府
初世祖既定額地以其處雲南極邊就立其蠻
長爲帥令三年一入貢至是來貢故立官府庚子熒惑
犯房壬寅以汪家奴知樞密院事別爾怯不花爲御史大
夫癸卯太白經天壬子熒惑犯東咸乙卯太白犯外屏太
陰犯斗丙辰太白經天是年江浙海運糧不足撥江西河

南五十萬石補之信州靈山裂鞏昌府山崩太廟惟舉冬祭五年亦如之

五年己卯春正月癸亥禁濫予僧人名爵庚午太陰犯井乙亥熒惑犯天江二月庚寅信州雨土甲午太陰犯昴庚子免廣海新增鹽課萬五千引壬寅太陰犯靈臺夏四月辛卯加封孝女曹娥爲慧感靈孝昭順純懿夫人罷興州興安縣壬寅太陰犯日星五月庚午太陰犯心壬申犯斗丙子太白犯昴六月壬寅月食甲辰熒惑退入南斗秋七月甲子熒惑犯南斗太陰犯房甲戌太白經天詔諸王位下官毋入常選乙酉太白經天凡七日八月甲午太陰犯斗丁酉太白犯軒轅乙巳太陰犯昴冬十月壬辰禁倡優盛服許男子裹青巾婦女服紫衣不許戴笠乘馬甲午命

柏顏爲大丞相加元德上輔功臣號柏顏矯殺鄴王徹徹
圖又奏貶宣讓王帖木爾不花威順王寬徹普化不侯命
輒遣去己亥熒惑犯壘壁陣十一月戊辰杞縣人范孟反
詐稱詔使至河南殺平章月祿帖木爾左丞劫烈廉訪使
完者不花等已而捕誅之癸酉江西新昌州雨木冰至明
年二月始解十二月甲午太陰犯昴癸卯熒惑犯外屏是
歲工部廳梁上出芝草一本七莖汀州大水漂民廬八百
區溺死八千餘人戶振鈔半錠死者倍之濮州范縣冀寧
桓州雲需府瀋陽等處饑共振鈔二萬五千錠米七千餘
石

六年庚辰春正月丁卯太陰犯鬼甲戌立司禋監改奉太
祖太宗睿宗御容於石佛寺乙亥太陰犯房三月己丑太

元史卷十四

本紀

三

陰犯昴丙申犯太微垣己亥黜柏顏爲河南行省左丞相
詔曰朕踐位以來命柏顏爲太師秦王中書大丞相而柏
顏專權自恣欺朕年幼輕視太皇太后變亂祖宗成憲虐
害天下加以極刑允合輿論朕念先朝之故尙存憫恤今
出爲河南行省左丞相所有元領諸衛親軍并怯薛台人
等詔書到時卽許散還輟耕錄云帝御玉德殿命史臣草
詔有云所領各部詔書到日悉還
本衛帝曰自早至暮皆一日也可改日字作時字時柏顏
以飛放爲名挾皇太子燕帖古思在柳林意將犯分詔既
成遣平章只爾瓦台齎至奉皇太子歸國命馬札爾台爲
各枝軍馬卽時散去一字之繫利害如此太師右丞相辭不拜以其子脫脫知樞密院事耶先帖木
爾爲御史大夫壬寅詔諸王侯不得懸帶弓箭環刀輒入
內府癸卯太陰犯心乙巳罷各處船戶及廣東采珠二提
舉司丁未太陰犯羅堰戊申熒惑犯日星立延徽寺奉寧

宗祀事己酉有星孛于房星大色白狀如粉絮尾跡長五寸餘彗指東南漸向西北行閱三十二日始滅三月甲寅漳州義士陳君用襲殺反賊李志甫授君用同知漳州府事癸亥太陰犯軒轅庚午犯房壬申犯南斗戊寅太白犯月星辛巳詔安置柏顏陽春縣未至死于道夏四月庚寅立明宗神御殿碑于大天元延壽寺以汪家奴平章政事塔識爲中書右丞五月己未漳州龍巖尉黃佐才與李志甫餘黨戰妻子四十餘口皆遇害擢佐才爲龍巖縣尹丁卯太陰犯斗丙子置月祭各影堂香於大明殿遇行禮命省臣就殿行香祭之六月丙申詔徹文宗廟主徙太皇太后弘吉刺氏于東安州放太子燕帖古思于高麗詔曰昔我皇祖武宗傳位仁宗之始定議易世之後舍子傳姪乃

祖母太皇太后惑於愴慝俾皇考出封雲南英宗遇害正統寢偏我皇考以武宗之嫡逃居朔漠及泰定帝升遐之後宗王大臣同心翊戴肇啟大事姑以地近先迎懷王哲總幾務繼知天理人倫所在假讓位之名以寶璽來上我皇考推誠不疑卽授以皇太子寶懷王稔惡不悛當躬返之際乃與其臣月魯不花耶里牙明里董阿等謀爲不軌使我皇考飲恨上賓歸而再御宸極海內聞之靡不切齒又私圖傳子乃構邪言嫁禍于八不沙皇后謂朕非明宗子俾出居遐陬祖宗大業幾於不繼內懷媿歎則殺耶里牙以杜口及其將死哀鳴畏在天之震怒始議立明考之嗣以追冥誅叔母弘吉刺氏復聽信權臣貪立幼稚使朕弟懿璘質班先嗣奄復不年諸王大臣以賢以長扶朕踐

位賴天之靈權奸屏黜念治必本於盡孝事莫先於正名

永惟鞠育罔極之恩忍忘不共戴天之義其命太常徹去

圖帖睦爾在廟之主并削去弘吉刺氏太皇太后之號徙

東安州安置放燕帖古思於高麗戮賊臣明里董阿等以

伸大義布告中外

太皇太后尋暴崩燕帖古思亦中道遇害

己亥成紀縣山崩

地坼辛亥太白晝見夜犯歲星秋七月甲寅詔封微子爲

仁靖公箕子爲仁獻公加封比干爲仁顯忠烈公丁巳太

白晝見戊午以星文示異地道失寧蝗旱相仍頒罪已詔

於天下己未以亦憐眞班爲御史大夫庚申太陰犯心甲

子犯羅堰戊寅命翰林奎章閣刪修大元統制名至正條

格九月癸丑加封漢張飛武義忠顯英烈靈惠助順王辛

酉太白犯虛梁丙寅詔有罪者毋籍其妻女丁卯太陰犯

昂熒惑犯歲星甲戌太陰犯軒轅冬十月甲申加上皇考

尊號爲順天立道睿文智武大聖孝皇帝始親裸太室以

太師馬札爾台爲亞獻官樞密知院阿魯圖爲終獻官

時帝

在位七年未嘗一至太廟御史以爲言乃始行親祀辛卯敕各愛馬人不許與常選

愛馬人謂諸王所統之軍丁酉太白入南斗己亥犯斗壬寅命脫脫爲

右丞相鐵木爾不花爲左丞相十一月乙卯太陰犯虛梁

戊午熒惑犯氏甲子月食辰星犯東咸戊寅犯天江以孔

克堅襲封衍聖公十二月癸未太陰犯虛梁乙酉犯上公

丁亥熒惑犯鉤鈴乙未犯東咸是月詔復科舉取士制國

子監積分生員三年一次依科舉例入會試中者取一十

八名罷天庥以後增設太禧宗禋等院改奎章閣爲宣文

閣藝文監爲崇文監

環谷集云帝作宣文閣於大明殿西北萬幾之暇御閣閱經史以左右儒

臣爲經筵官
日侍講讀

至正元年辛巳春正月己酉朔詔改至元七年爲至正元
年甲寅熒惑犯天江庚申犯井辛未犯心癸酉犯斗詔天
壽節禁屠宰六日甲戌太白晝見凡四日命永明寺寫金
字經一藏二月己卯太白晝見癸巳太陰犯明堂三月庚
戌罷兩淮屯田手號打捕軍癸酉撥屯儲禦軍于芍陂洪
澤德安三處屯種己未汴梁地震罷河西務行用庫立廣
福富昌二庫隸資政院復設衛候司拱儀局司禋監夏四
月丁丑道州土賊蔣丙等反破江華明遠二縣戊寅彰德
有赤風自西北起晝晦如夜庚寅以塔識平章政事阿魯
爲中書右丞許有壬爲左丞丁酉兩浙水免歲辦餘鹽三
萬引庚子杭城火燬官民舍幾盡

輟耕錄云至正辛巳春江浙平章只里瓦台入

城之任衣紅衣民謠曰火殃來矣至四月杭州火燬官民
馬屋公解寺觀一萬五千七百五十五間燒死七十四人
明年壬午四月災尤甚數百閏五月丁丑加封滹沱河神
年浩繁之地凋敝實基於此
爲昭佑靈源侯甲午賞扈從明宗諸王官屬八百七人金
銀鈔幣有差壬寅刻宣文至正二寶輟耕錄云上作二小
日洪禧命楊瑀篆文洪禧璞純白而龜紐墨色六月戊午禁高麗及民間以子爲
宦者避賦役庚午太陰犯井秋七月乙酉太陰犯填星庚
寅犯雲雨九月庚辰太陰犯建星壬午犯鉞星及井宿己
丑賜文臣宴于拱辰堂冬十月甲寅以海運不給令江浙
行省於中政院財賦府撥賜寺觀田糧總運二百六十萬
石乙卯歲星犯氏丁巳太陰犯月星戊午月食既十一月
丙子道州土賊何仁甫等反庚辰分吏禮兵刑四部爲二
庫戶工兩部爲二庫各設管句一員己亥太陰犯東井庚

子犯天江十二月乙卯詔民年八十以上者蒙古人賜絹帛餘各旌以高年耆德之名竝免雜役丁巳太陰犯壘壁陣己未立四川安岳縣癸亥以在庫至元中統鈔二百八十二萬餘錠可支二年停造明年鈔本革王伯顏察爾等所獻檀景等州產金地是歲山東燕南寇盜縱橫至三百餘處崇明通泰等州海潮溫溺死千六百餘人振鈔萬一千八百錠復行太廟四時祭二年三年亦如之

二年壬午春正月丙戌開京師金口河深五十尺廣一百五十尺役夫十萬人費用不貲卒無成功降咸平府爲縣升懿州爲路以太寧所轄興中義州屬之戊子太陰犯明堂甲午熒惑犯月星三月戊子太陰犯房夏四月辛丑冀寧路平晉縣地震裂地尺餘民居皆傾庚申太陰犯羅堰

罷雲南蒙慶邦牙二宣慰司五月甲申太白經天東平雨
雹如馬首六月戊申奪江浙撥賜僧道田還官徵糧以備
軍儲壬子濟南山崩水涌汾水大溢秋七月庚午惠州羅
浮山崩乙未太陰掩太白丁酉太白晝見以賀惟一爲中
書參知政事辭不就拂郎國貢異馬長丈一尺三寸高六
尺四寸身純黑後二蹠皆白

圭齋集云帝御慈仁殿拂郎國進大馬敕周朗貌以爲圖

圖成上命揭侯斯爲贊

八月庚子朔日食丙午太白晝見九月己巳

湖廣平章鞏卜班討道州賊平之復溪洞堡寨二百餘處
丁丑太陰犯羅堰戊子犯井冬十月己亥朔日食癸卯太
陰犯建星甲寅犯天關壬戌遣官致祭孔子於曲阜甲子
權免兩浙額鹽十萬引福建餘鹽三萬引十一月甲申免
雲南明年差稅辛卯歲星熒惑太白聚于尾十二月己酉

京師地震辛亥阿魯圖滿等以謀害宰臣圖逆伏誅是歲

大同饑人相食河間冀寧等路水杭州火振鈔三十萬錠

三年癸未春二月甲辰太陰犯井填星犯斗熒惑犯羅堰

乙卯太陰犯氏遼陽吾者野人及水達達皆叛為捕海東青煩擾故

也三月戊寅詔作新風憲在內官不法者監察御史糾劾

在外官不法者行臺監察御史糾劾壬午太陰犯氏敕修

宋遼金三史以丞相脫脫為都總裁官綱目云或欲如晉書例以宋為世紀

而遼金為載記或謂遼立國先宋五十年宋南渡後當稱

臣於金以為不可待制王理著三史正統論欲以遼金為

北史建隆至靖康為宋史建炎後為南宋史持議不決詔

遼金宋各自為史輟耕錄云朝廷開局修史詔求遺書有

以書獻者予一官繼命定終場下第舉人充學正山長國

學生會試不中者與終場舉人同夏四月丙申朔日食兩

都桑葉皆生黃色龍文河決白茅口六月壬子命經筵官

元史卷十四

七

一月三進講

安雅堂集云帝優禮講官既賜酒饌又以高年疲於步趨命皆得乘舟太液池徑西院歸

秋七月戊寅立永昌等處宣慰司庚辰太白犯右執法河南自四月至是霖雨不止八月甲午朔命朵思麻宣慰司同知鎖爾哈等討四川上蓬瑣吃賊九月甲子湖廣平章鞏卜班禽搖賊唐大二蔣仁五至京誅之其黨蔣丙復號順天王攻陷連桂二州冬十月戊戌鐵木爾不花罷丁未月食己酉帝親祀上帝于南郊以太祖配右丞相脫脫爲亞獻太尉阿魯圖爲終獻官己未以郊祀禮成赦天下文官減一資武官升散秩一等調民間田租五分賜高年帛十二月丁未命別爾怯不花爲左丞相韓元善參知政事膠州高密縣地震是歲罷民間食鹽徵清江處士杜本不至

四年甲申春正月辛巳定守令黜陟之法六事備者升一

等四事備者減一資三事備者平遷六事俱不備者降一

等

六事者戶口增田野闢詞訟簡盜賊息賦役均及常平得法也按職官志止五事不及常平

庚寅河

決曹州募夫萬五千人築之又決汴梁閏二月乙亥月食

三月丁酉復立武功縣癸丑以納麟平章政事姚庸爲中

書左丞夏五月甲辰右丞相脫脫辭職命阿魯圖代之封

脫脫爲鄭王黃河暴溢決金隄曹濮濟兗皆罹患北侵安

山沿入會通運河秋七月戊子朔溫州颶風大作海水溢

地震益都鹽徒郭火侖赤作亂上太行由陵川入壺關至

廣平殺兵馬指揮使復還益都莒州蒙陰縣地震九月丁

亥朔日食冬十一月丁亥朔以各郡縣民饑禁抑配食鹽

復令民入粟補官戊子禁內外官民宴會不得用珠花十

二月己未增置四川省推官及惠民藥局壬戌太陰犯外
屏漢陽東平地震是歲太廟惟舉春秋二享五年亦如之
五年乙酉春正月薊州地震以陳思謙參議中書省事夏
四月丁卯遣大都流民還鄉官給路糧募富戶出米五十
石以上者旌以義士號五月己丑放軍士所掠子女千一
百人還雲南仍給行糧丁未河間竈戶水災權停餘鹽二
萬引候年豐還官秋七月丁亥河決濟陰丙午命塔識爲
御史大夫九月壬午朔日食辛丑以搠思監爲中書左丞
朵爾直班呂思誠竝參知政事冬十月壬子以賀惟一爲
御史大夫賜名太平元制臺端非國姓不授故特賜蒙古名本傳作六年事辛酉遣
使宣撫巡行天下詢民疾苦疏冤滯調煩苛察官吏賢否
明加黜陟有罪者四品以上停職申請五品以下就便裁

決一切利害悉聽興革命忽都不丁何執禮之兩浙江東

道散散王士宏之江西福建道拔實秦德從之江南湖廣

道定僧魏景道之河南江北道蠻子李獻之燕南山東道

不花靳義之河東陝西道伯家奴王耶速迭爾之山北遼

東道阿牙赤王紳之甘肅永昌道定蘇天爵之京畿道

左荅納失里賈惟貞之海北海南廣東道阿乞刺杜德遠

之雲南省荅爾麻失里王守誠之四川省

時諸道奉使者皆與臺憲互相

掩蔽惟京畿道定蘇天爵湖廣道拔實糾舉無所避辛未宋遼金三史成帝謂羣

臣曰史既成書前人善惡朕當取爲法戒然豈止激勸爲

君者爲臣者亦當知之卿等其體朕心以前代善惡爲勉

十一月甲午至正條格成頒示天下奉元路陳望叔僞稱

燕帖古思太子伏誅十二月丁巳詔定薦舉守令法

六年丙戌春二月庚戌朔日食辛未山東地震七日乃止
三月辛巳盜扼李開務開河劫商船官軍不敢捕京畿山
東盜竝起夏四月丁卯萬戶賈住討吾者野人遇害詔恤
其家命左右二司六部吏屬於午後講習經史五月壬午
罷江西田賦提舉司丁亥盜竊太廟神主丁酉立河南山
東行都水監專治決河六月己酉汀州連城縣民羅天麟
陳積萬作亂陷長汀縣丁巳雲南賊死可伐作亂滇志作思可法
侵奪路甸命亦圖渾爲雲南平章討之秋七月丁亥散毛
洞蠻覃全在叛招降之立散毛誓厓軍民宣撫司癸巳選
怯薛官爲路府縣達魯花赤丙申以呂思誠爲中書左丞
朵爾直班爲右丞荅爾麻參知政事九月乙酉克復長汀
縣戊子邵武地震有聲如鼓至夜復鳴冬閏十月乙亥詔

赦天下免差稅三分水旱之地全免靖州徭賊吳天保陷黔陽有眾六萬癸未汀州賊徒羅德用殺賊首羅天麟陳積萬以首級送官餘黨悉平十二月甲申復立大護國仁王寺昭應宮財用規運總管府凡貸民錢二十六萬餘錠甲午增北邊海海刺圖二處屯田後以沙土苦寒不久遂廢復立八百宣慰司以土官韓部襲其父爵尙書李綱請躬祀郊廟近正人遠邪佞以崇陽抑陰不聽是歲阿魯圖罷太廟惟舉夏秋二享

七年丁亥春正月甲辰朔日食大寒而風朝官多仆者壬子命別爾怯不花爲右丞相塔識爲左丞相蓋苗參知政事庚申雲南老丫等蠻來降懷宇記作老撾立老丫耿凍路軍民總管府丙寅汰宿衛士止存累朝定額二月甲戌朔山東

地震壞城郭棣州有聲如雷河南山東盜蔓延濟寧滕邳徐州等處庚辰以瑣南班爲中書右丞道童參知政事宦者伯帖木爾爲司徒徭賊吳天保寇沅州陷澈浦辰溪縣以阿吉刺知樞密院事三月乙巳修光天殿庚戌試國子監會食弟子員選補路府及各衛學正戊午敕編六條政類夏五月乙丑別爾怯不花以災異乞罷詔以太保就第臨淄縣地震七日乃止免太師馬札爾台官放之西寧州其子脫脫欲與父俱行帝從其請以太平平章政事秋七月甲寅召隱士完者圖執禮哈琅爲翰林待制張樞董立爲修撰李孝光爲著作郎樞不至丙辰太陰犯壘壁陣丁巳以納麟爲御史大夫九月癸卯八鄰內哈刺那海圖魯和伯賊起斷嶺北驛道癸丑上都早霜殺禾甲寅詔舉材

能學業之人以備侍衛辛酉塔識卒命國王多爾只爲左丞相丁卯吳天保陷武岡延及寶慶殺行省右丞沙班冬十月丁丑詔左右丞相平章樞密知院御史大夫得賜玉押字印餘官不與辛卯開東華射圃戊戌西番盜起凡二百餘所陷哈刺火州劫供御蒲萄酒殺使臣十一月甲辰沿江盜起兩淮鹽運使宋文瓚上言世皇開會通河千有餘里歲運米至京者五百萬石曩者騎賊不過四十人扼李開務劫船三百艘有司莫能捕至江陰通泰爲江海門戶鎮江眞州次之國初設萬戶府鎮其地今戍將非人致使賊艦往來無常集慶花山賊僅三十六人官軍數萬不能進討反爲所敗後竟假手鹽徒雖能成功豈不貽笑宜亟選智勇以圖後功不然東南五省租賦之地恐非國家

所有不報

輟耕錄云花山賊畢四等僅三十六人內一婦人尤勇捷殺傷官兵無數縱橫茅山三月餘三

省撥兵不能捕後募饒徒朱陳等率其黨一鼓禽之撥山東地十六萬二千餘頃給

大承天護聖寺爲永業庚戌太陰犯天廩甲寅災天保陷

靖州命威順王寬徹普化鎮南王孛羅不花將兵討之己

未以韓嘉訥爲中書平章政事

紀稱是月以嘉訥爲陝西行臺大夫而通鑑則稱以

嘉訥爲平章按宰相年表至正七八九年皆載嘉訥名故改正之丁卯湖北湖南徭賊竊

發有司不以聞詔降散官一等馬札爾台卒於甘肅召脫

脫還十二月庚午命多爾只爲右丞相太平爲左丞相丙

子帝以連年水旱民多失業特選臺閣名臣二十六人出

爲守令許民間利害實封呈省丙戌以河南盜賊充斥分

撥達達軍與揚州舊軍赴沿河關隘戍守是歲置中書議

事平章四人太廟不舉秋享

八年戊子春正月戊戌朔以耶先帖木爾知樞密院事辛亥黃河決遷濟寧路於濟州命湖廣右丞圖赤都元帥完者帖木爾討莫磐洞諸蠻縛其洞酋楊鹿五赴京師二月乙亥復立孛答乃圖忙兀三處屯田隸虎賁司庚辰太陰犯軒轅癸未犯平道壬辰以前奉使宣撫廣東道賈惟貞稱職特授永平路總管立行都水監于鄆城以賈魯爲太監三月丁酉詔頒金帛旌守令之廉勤者壬寅吐蕃盜起有司請不拘資級委官討之福建盜起分立汀漳二元帥府鎮之丙辰太陰犯建星己未遣使銓閩廣蠻夷等官選辛酉遼陽鎮火奴及兀顏撥魯歡詐稱大金子孫作亂官軍討斬之夏四月乙亥帝視國子學升衍聖公秩從二品定弟子員出身及奔喪省親等制詔守令選立社長專一

勸課農桑京官三品以上歲舉守令一人守令到任三月亦舉一人自代其玉典赤拱衛百戶不得任縣達魯花赤止授佐貳官平江松江大水留海運糧十萬石振之五月丁酉朔大霖雨京城崩庚子廣西灘江溢四川旱饑禁酒六月丙寅朔升徐州爲府以邳宿滕嶧四州隸之丙戌立司天臺于上都秋七月丙申朔日食壬子量移竄徙官於近地安置死者聽歸葬江州總管劉恆有政績超升山東宣慰司八月丙子太陰犯壘壁陣九月乙未太陰犯靈臺冬十一月辛亥吳天保掠全州以太不花忽都不花並平章政事台州黃巖民方國珍作亂聚眾海上命江浙參政朵爾只班討之是歲太廟闕冬祭

九年己丑春正月庚戌太白犯建星辛亥犯平道命太不

花提調會同館三月丁酉壩河淺涸調軍民各萬人浚之
己亥太白犯壘壁陣夏四月丁丑以欽察台平章政事韓
元善爲中書左丞壬午以河間水災住煎鹽三萬引五月
戊戌加脫脫太傅提調內史府庚子修黃河金隄民夫日
給鈔三貫庚戌命翰林國史院等官薦舉守令丙辰定守
令督攝之法路督攝府府督攝州州督攝縣是月白茅河
東注沛縣成巨浸蜀江湔灌漢陽城民大饑詔刻小玉印
其文曰至正珍祕凡祕書監所掌書畫皆識之秋七月庚
寅監察御史幹勒海壽劾殿中侍御史哈麻及其弟雪雪
交結脫忽思皇后宮闈脫忽思帝庶母御史大夫韓嘉訥以聞不
省章三上詔奪哈麻雪雪官居之草地出海壽爲陝西副
使左遷嘉訥爲江浙平章壬辰命皇子愛猷識理達臘習

學漢文以李好文爲諭德歸暘爲贊善張冲爲文學甲午以耶先帖木爾復爲御史大夫亦憐真班知樞密院事提調武備寺丙午太陰犯壘壁陣癸丑犯天關乙卯丞相多爾只太平俱罷復命脫脫爲右丞相搠思監爲右丞玉樞虎爾吐華參知政事戊午命岐王阿剌乞鎮西番九月甲子敕建言中外利病者委官選其可行之事以聞丙戌熒惑犯靈臺冬十月丁酉命皇子入端本堂肄業丞相脫脫領端本堂事司徒雅普化知端本堂事皇子與師傅分東西向坐授書其下僚屬以次列坐

長安親師就傳拜諭德贊善各一員文公集云至正九年冬詔以皇子春秋日林學士直學士待制兼其職復置正字司經各二員仍命以翰聖宮西偏故宣文閣改日端本堂爲肄學之所十一月九日皇子始就學其堂虛中坐以俟至尊臨幸皇子坐於皇帝位之右而左向其左設師傅之位諭德以下以次列坐而右向比授經則別設授讀位司經正字執經導皇子及

諭德以下選爲
伴讀者凡十人

十一月戊午朔日食戊辰太陰犯畢庚辰
太白犯壘壁陣十二月戊戌太白復犯壘壁陣丁未吳天
保陷辰州皇后脫忽思以幹勒海壽之言侵己泣訴於帝
帝怒奪海壽官并誣韓嘉訥賊罪杖流奴兒干死是歲詔
汰冗官均俸祿賜致仕官及高年帛太廟不舉秋享

十年庚寅春正月丙辰朔以搠思監平章政事玉樞虎爾
吐華爲中書右丞壬戌立四川容美洞軍民總管府壬申
太陰犯熒惑甲戌隕石棣州色黑中帶金星先有聲自西
北來至州北二十里乃隕二月丙戌加封天妃父種德積
慶侯母育聖顯慶夫人辛丑太陰犯平道甲辰犯鍵閉三
月己卯熒惑犯太微垣奉化州山石裂有禽鳥草木山川
人物之形夏四月丁酉詔赦天下丙午太白犯鬼六月壬

子有星大如月入北斗震聲若雷三日復還秋七月辛酉太陰犯房辛未太白晝見丁丑復見九月癸丑朔太白晝

見辛酉祭京師三皇廟

先是歲祀以醫官行禮江西廉訪使文殊訥言禮有未備乃敕工部

具祭器江浙造雅樂太常定儀式翰林撰樂章至是用之

壬戌熒惑犯天江壬午以吏

部條格繁多銓選者得意爲高下命編類成書冬十月癸巳歲星犯軒轅丙申太陰犯昴大名東平濟南徐州各立兵馬指揮司俾捕馬賊十一月壬子朔日食罷遼陽濱海民煎野鹽戊辰太陰犯鬼己巳從尙書僕哲篤都事武祺言更定鈔法詔以中統交鈔一貫文省權銅錢一千文準至元寶鈔二貫仍鑄至正通寶錢與歷代銅錢竝用以實鈔法是月三星隕于耀州化爲石如斧形削之有屑擊之有聲十二月壬午朔以大司農圖魯等兼領都水監集河

防正官議黃河便益事乙未太陰犯鬼己酉方國珍寇溫州命江浙左丞李羅帖木爾討之京師麗正門樓上忽有人妄言災禍鞠之自稱薊州人已而不知所往是冬溫煥草木皆萌芽吐花大雪而雷電是歲太廟四祭皆不舉

十一年辛卯春正月丙辰辰星犯牛丁卯蘭陽縣有紅星大如斗自東南墜西北其聲如雷立湖南分元帥府于寶慶路山東分元帥府于登州二月庚寅太陰犯鬼乙未犯太微丁酉犯亢三月丁卯太陰犯東咸戊辰犯天江徵建寧處士彭炳爲端本堂說書不至夏四月壬午詔開黃河故道命賈魯以工部尙書充總治河防使發汴梁大名十三路民十五萬廬州等戍十八翼軍二萬供役仍命右丞玉樞虎爾吐華同知樞密院事黑斯以兵鎮之冀寧孟州

地震半月乃止乙酉加封河瀆神爲靈源神祐弘濟王重建河瀆及西海神廟丁酉立鎮寧州辛丑師壁洞土官田盧什用盤順府土官墨奴什用降立長官司四五月己酉朔日食辛亥潁州妖人劉福通作亂以紅巾爲號陷本州其黨韓山童就禽山童子韓林兒逃之武安軍六月劉福通據朱皋攻破羅山眞陽確山上蔡遂犯舞陽葉縣寧羅帖木爾討方國珍兵敗被執秋七月丁巳罷四川大奴管句洞長官司改立忠孝軍民府己未太陰犯斗壬戌犯右執法己巳太白犯左執法熒惑入鬼命大司農達識等招諭方國珍國珍僞降八月丁丑朔中興地震乙酉太陰犯天江丙戌蕭縣李二號芝羅田徐壽輝本名貞寇起李二陷徐州壽輝陷蘄州亦以紅巾爲號九月壬子命御史大夫

耶先帖木爾知樞密院事將諸衛軍十餘萬討河南妖寇
乙卯辰星犯左執法丁巳太白犯房戊辰太陰犯鬼劉福
通陷汝寧府及息光二州徐壽輝陷蘄水縣及黃州路冬
十月戊寅熒惑犯太微垣辛巳太陰犯斗癸未立寶泉提
舉司於各省鼓鑄至正通寶錢印造交鈔令民間通用乙
酉太白犯斗己丑太白晝見熒惑犯歲星辛卯太白犯斗
癸巳歲星犯右執法丙午熒惑犯左執法是月饒州建寧
雨黑子大如菽信衢二州及邵武路雨黍民多取食之徐
壽輝據蘄水爲都國號天完僭稱帝改元治平十一月癸
丑有星孛于婁甲寅見于胃丁巳微見于畢太陰犯填星
黃河堤成河復故道遣使告祭河伯召賈魯還超授集賢
大學士命翰林承旨歐陽玄製河平碑十二月丙子朔太

白晝見丁丑太白經天己卯立河防提舉司隸行都水監
庚辰太白犯壘壁陣甲申太陰犯填星丙戌以烏古孫良
楨參知政事辛卯太白經天丁酉太白晝見太陰犯熒惑
庚子太白經天辰星犯天江辛丑耶先帖木爾復上蔡縣
禽劉福通僞將韓咬兒等送大都誅之壬寅太白晝見是
年太廟闕秋享

十二年壬辰春正月戊申竹山縣賊陷襄陽總管柴肅死
之是日荆門州亦陷庚戌以月魯不花平章政事壬子諭
河南湖廣調兵討賊正當首春耕作之時恐農民不安田
畝守令有失勸課宜委通曉農事官分道巡視督勒有司
親詣鄉都省諭農民依時播種務使人盡其力地盡其利
其有曾經盜賊水患供億繁重貧民不能自備牛種者所

在官爲量給仍飭領兵官嚴禁屯駐軍馬毋得踐踏以致農事廢弛丙辰徐壽輝遣將丁普郎徐明遠陷漢陽及興國府己未徐壽輝僞太師鄒普勝陷武昌辛酉徐壽輝遣將魯法興陷安陸知府丑盧死之癸亥添設刑部尙書侍郎各一員乙丑太陰犯熒惑己巳歲星犯右執法壬申中興路陷拘刷大都河南陝西遼陽漢人馬二月乙亥朔以賈魯爲中書添設左丞命諸王圖堅守揚州李蘭奚守大名寧王身安沙鎮四川乙酉徐壽輝兵陷江州總管李黼死之遂陷南康及岳州庚寅太陰犯太微垣癸巳犯氐辛丑置安東安豐分元帥府鄧州賊王權張椿陷澧州龍鎮衛指揮使掩都刺哈蠻帥師復之是月賊侵滑濬諸邑起德住爲河南右丞守東明賊不敢犯

時德住致仕于家聞命卽出

徐壽

輝僞將歐祥陷袁州命帖里以中書參政分省濟寧定遠

人郭子興起兵自稱元帥與其黨孫德崖等破濠州三月

乙巳朔徐壽輝僞將許甲攻衡州陶九陷瑞州壬子以太

不花爲河南省平章史作左丞克復南陽等處癸丑重行

納粟補官之令有能自備糧米供給軍儲者照依定擬地

鹽茶錢穀等官能再輸糧供戊午太陰犯進賢壬戌犯東

咸甲子徐壽輝遣將項普略陷饒州路遂陷徽信二州丁

卯出幣帛各十萬匹於迤北萬戶千戶所易馬戊辰太白

晝見詔省院臺官依世祖舊制兼用南人有才學者立饒

州德興銅冶場時有張理獻言贍水浸熾可成詔隨朝諸

正官各舉循良材幹智勇兼全堪充守令者二人多者不

限員數試用守令竝兼管義兵防禦諸軍奧魯勸農事任

滿稱職者許實授凡除常選官於殘破郡縣及逼近賊境者升四等稍近者升二等方國珍復劫其黨入海台州路達魯花赤泰不華與戰于澄江死之隴西地震百餘日城郭頽圯陵谷變遷定西會州靜寧莊浪尤甚會州公廨牆崩獲弩五百餘張長丈餘人莫能挽改定西爲安定州會州爲會寧州閏月壬午以荅失拔都魯爲四川添設參政與本省平章咬住同討山南湖廣賊乙酉徐壽輝僞將陳普文陷吉安路鄉民羅明遠起義兵復之壬辰遣官詣上都分給出征河南達達軍口糧立淮南江北行省治揚州兼轄高郵淮安滁和廬州安豐安慶蘄州黃州丁西湖南參政鐵傑復岳州四川平章咬住克取忠萬夔雲陽等州戊戌以晃火爾不花平章政事蠻子爲中書右丞秦從德

爲左丞荅失圖趙璉竝參知政事悟良哈台杜秉彝爲添設參知政事命江西左丞相亦憐眞班守江東關隘諸王亦憐眞班愛因班參政耶先帖木爾與陝西平章月魯帖木爾討南陽襄陽賊刑部尙書阿魯討海寧賊江西右丞火尼赤與參政朵斛討江西賊浙東宣慰使恩寧普守蕪湖江西右丞兀忽失江浙左丞星吉不顏帖木爾蠻子海牙同討饒信賊方國珍不受撫命江浙左丞左荅納失里討之知樞密事耶先帖木爾駐軍沙河軍中夜驚軍潰退屯朱仙鎮命中書右丞蠻子代總其軍召耶先帖木爾還仍爲御史大夫西臺御史范文等十二人劾其喪師辱國不聽夏四月癸卯朔日食江西臨川賊鄧忠陷建昌路中寅以搠思監渾都海牙竝平章政事提調畱守司丙辰江

西宐黃賊塗佑與建寧賊應必達攻陷邵武路千戶魏瀆以計禽之復其城辛酉四川參政桑哥失里復渠州荆門知州聶炳復荆門州四川平章咬住復歸州進攻峽州詔天下完城郭築堤防命亦都護月魯帖木爾領畏吾兒軍同豫王阿剌忒納失里知樞密事老章同討襄鄧賊左遷西臺御史大夫朵爾直班爲湖廣平章范文等十二人爲各路添設佐貳官五月癸酉朔太白犯填星己卯咬住復中興路庚辰徙瀛國公之子和尙趙完普及親屬于沙州禁勿與人通罷朮兒棚等場金銀課停海漕夏運癸未建昌民戴良起鄉兵克復本路乙酉命畱守帖木哥與諸王多爾只守口北龍慶州荅失拔都魯至荆門募兵趨襄陽與賊戰大克之六月辛亥太白犯井丙寅紅巾賊周伯顏

陷道州秋七月庚辰徐壽輝黨項普略由饒徽犯昱嶺關陷杭州路江浙參政樊執敬戰死濟寧路總管董搏霄率兵復之遂克徽州己丑湘鄉賊陷寶慶路庚寅丞相脫脫請親出師討徐州帝許之六部尙書合疏乞畱不聽丁酉辰星犯靈臺湖南副元帥小云失海身總管兀顏思忠復寶慶路徐壽輝僞將王善等陷福安寧德等縣八月甲辰復以哈麻爲中書添設右丞丁卯詔脫脫以太傅右丞相督制諸軍省院臺分官屬從行稟受節制卽日發京師是夜太白犯歲星安陸賊將俞君正復陷荊門州知州聶炳死之賊將黨仲達復陷岳州九月乙亥俞君正復陷中興咬住與戰于樓臺敗績奔松滋本路判官上都死之癸未中興義士范忠偕荊門僧李智率義兵復中興路降咬住

爲淮西元帥司饋餉辛卯脫脫復徐州屠其城李二遁走

壬辰太陰犯軒轅庚子詔加脫脫太師趣班師還朝冬十

月戊午太陰犯鬼甲子犯歲星乙丑犯亢霍山崩

前三日山如雷

鳴禽獸駭散

十一月辛未命江浙平章慶童收捕常州賊

乙亥以星吉爲江西平章擊趙普勝於湖口兵敗死之丙

子遣南臺侍御史左荅納失里江浙右丞帖里總兵討方

國珍癸未脫脫請興近畿水利召南人耕種歲可得粟麥

百萬石不煩海運京師足食帝曰此事有利于國其速行

之庚寅太陰犯太微垣十二月辛亥詔杭常湖信廣德諸

路皆新復赦詿誤者蠲其租命有司加意撫恤是歲海運

不通京師闕食潁州沈丘人察罕帖木爾與羅山李思齊

同起義兵破賊有功授察罕汝寧府達魯花赤思齊爲知

府李二餘黨趙均用入濠州據之僭稱王

十三年癸巳春正月庚午朔用帝師請釋在京罪囚辛未立分司農司以悟良哈台爲右丞烏古孫良楨爲左丞兼大司農卿給分司農司印西自西山南至保定河間北抵檀順州東及遷民鎮凡係官地及元管屯田悉從分司農司召募農夫立法佃種給鈔五百萬錠供其費丙子方國珍復僞降庚辰募江淮善種水田修築圍堰者各千人爲農師降空名告身十二道遣使齎往募農民百人者授九品二百人者授八品三百人者授從七品卽填流官職名與之令領所募人至田所期年散歸人給鈔十錠乙酉太陰犯太微垣丙戌荅失拔都魯克復襄陽樊城庚寅老章克復南陽唐州戊戌熒惑太白辰宿聚于奎二月己酉太

陰犯軒轅庚戌太白犯熒惑壬子太陰犯太微垣甲寅立
脫脫平徐勣德碑命領大司農司提調太史院司天監夏
四月辛丑太白犯井辛亥太陰犯房降徐州路爲武安州
改所轄縣屬歸德府其滕州嶧州仍屬益都路五月辛未
江西左丞相亦憐真班率師由信州元帥韓邦彥由徽州
浮梁同取饒州蘄黃賊奔潰乙亥太陰犯歲星乙未泰州
白駒場亭民張士誠及其弟士德士信作亂陷泰州及興
化縣高郵知府李齊不屈死士誠自稱誠王僭號周建元
天祐六月丙申朔立皇子愛猷識理達臘爲皇太子復置
詹事院以丞相脫脫兼領俾得銓注官屬庚子命知樞密
院事失剌把都總河南軍平章荅失拔都魯總四川軍自
襄陽分道而下克復安陸府癸卯詔平章達識總領漢軍

蒙古守禦淮南遼東吾者野人撈羊哈及乾帖困朮赤朮等五十六人以皮貨來貢給銀牌一面令管吾者野人秋七月丁卯泉州天雨白絲海潮日三至戊辰太白晝見命宦官至一二品者依常例給俸壬申湖廣參政阿魯輝復武昌及漢陽府資政院使脫火赤復江州路九月乙丑朔日食庚寅太陰犯熒惑壬辰太白經天熒惑犯左執法冬十月甲辰歲星犯氐丁未廣西元帥甄崇福復道州庚戌從帖里左荅納失里請授方國珍徽州路治中國璋廣德路治中國瑛信州路治中國珍疑懼不受命立水軍都萬戶府于崑山州以納麟哈刺爲正萬戶董搏霄爲副萬戶癸亥太白犯亢是月徹世祖所立氍帳改建殿宇十一月壬申太陰犯壘壁陣丁亥江西右丞火尼赤以兵平富州

臨江遂復瑞州立義兵千戶水軍千戶所于江西十二月
丁酉太白犯東咸庚子熒惑入氐庚戌京城無雲而雷少
頃有火見于東南懷慶路及河南府西北有聲如擊鼓者
數四已而雷聲震地丁巳太陰犯心江浙平章卜顏帖木
爾等會兵討徐壽輝于蘄水敗走之獲僞官四百餘人陝
西四川行省合兵復均房等州是歲起清寧殿前山子月
宮諸工役重建穆清閣帝行西僧祕密運氣術號演揲兒
法是冬闕享太廟

十四年甲午春正月甲子朔汴河冰文成五色花草如繪
畫三日方解乙丑熒惑犯歲星丁卯太白犯建星癸酉熒
惑犯房立遼陽漕運庸田司屬分司農司丙戌荅失拔都
魯復峽州二月戊午太白犯壘壁陣遣吏部侍郎貢師泰

元史卷十四

本紀

三

和糴于浙西得糧百萬石立鎮江水軍萬戶府河南淮南
竝立義兵萬戶府有功者權授軍職事平改民官建清河
太壽元忠國寺括江浙廢寺田歸之三月癸亥朔日食詔
北邊有馬之家十取其二每馬給鈔十錠夏四月癸巳朔
介休縣地震泉涌以武祺參議中書省事方國珍復擁船
據海道阻絕糧運遣江浙右丞阿爾溫沙參政恩寧普總
兵討之復立應昌全寧二路先有旨撥屬魯王王傳府有司以爲不便故仍立之造
過街塔于盧溝橋修白浮瓮山堤五月甲子修北巡所經
色澤嶺黑石頭河西沿山道路立南陽鄧州等處毛胡盧
義兵萬戶府募土人爲軍免其差役令討賊自效因其鄉人自相
團結各佩毛胡盧藏兵器爲號因以名之命四川平章王樞虎爾吐華募兵萬
人下蜀江守荊門荅失拔都魯提兵赴汝寧六月辛卯朔

張士誠寇揚州達識以兵討之敗績士誠陷盱眙泗州甲辰太陰犯斗秋七月甲子襄垣縣大風拔木偃禾乙丑太陰犯角壬午犯昴孝義縣地震郭子興自稱滁陽王九月己未朔復以呂思誠爲中書左丞相月闕察爾平章政事命丞相脫脫總制諸王各翼軍馬出征高郵甲子方國珍徇浙東元帥耶忒迷失知州趙宣浩以俟命冬十月戊戌詔荅失拔都魯及太不花會軍討安豐賊壬子太陰犯太微垣十一月丙寅敕省院臺凡奏事先啟皇太子丁卯脫脫統大軍至高郵與張士誠連戰皆捷分兵平六合縣賊勢大蹙丙子太陰犯鬼荅失拔都魯復苗軍所據鄭鈞許三州十二月辛卯命定住爲左丞相哈麻鎖南班竝平章政事監察御史袁賽因不花等劾脫脫及其弟耶先帖木爾

前後出師略無寸效章三上帝令耶先帖木爾出國門聽旨以汪家奴代爲御史大夫丁酉詔以脫脫老師費財坐視寇盜漠不爲意削去官爵安置淮安路耶先帖木爾庸懦無能安置寧夏路以太不花爲河南左丞相月闊察爾爲太尉雪雪知樞密院事代領其軍免大都上都興和三路稅糧一年被災殘破地方竝蠲租三年罷庸田茶運寶泉等司戊戌以桑哥失里爲中書添設左丞己亥太陰掩昴己酉紹興路地震荅失拔都魯復河陰鞏縣徭賊寇衡州萬戶許脫因死之是歲詔民間私租大重以十分爲率普減二分著爲例帝自製龍舟於內苑又自製宮漏精巧皆絕出人意

十五年乙未春正月戊辰太陰犯五車辛未犯鬼丁丑徐

壽輝僞將倪文俊復陷沔陽府遣部將明玉珍守之玉珍
遂據重慶庚辰復設仁虞雲需尙供三總管府閏月壬寅
摘各衛軍屯田京畿人給鈔五錠丙午太陰犯心丙辰太
白經天二月己未劉福通迎立韓林兒爲帝又號小建都明王
亳州僭號宋改元龍鳳戊辰命汪家奴爲右丞相定住爲
左丞相壬申立淮東宣慰司都元帥府于天長縣統濠泗
義兵萬戶府聽富民願出丁壯五千名者爲萬戶五百名
者爲千戶百名者爲百戶是月郭子興死三月庚寅太陰
犯五車甲午授皇太子玉冊賜冕服九旒祇謁太廟丙申
太陰犯房辛丑改竄脫脫于雲南鎮西路耶先帖木爾于
四川礪門并籍其家癸丑太白經天夏四月癸酉命定住
爲右丞相哈麻爲左丞相桑哥失里平章政事雪雪爲御

史大夫丁丑立宣化鎮南軍民府于四川升四川羊母甲洞臭南王洞長官司爲忠義軍民安撫司五月壬辰監察御史耶里忽都劾河南左丞相太不花慢功虐民詔削職命荅失拔都魯爲河南行省平章代之駐軍陳畱庚戌倪文俊自沔陽陷中興路元帥朵爾只班死之六月癸亥太白經天丁丑保德州地震庚辰徵徽州隱士鄭玉爲翰林待制不至是月濠州朱元璋即明太祖起兵歷陽渡江取太平路秋七月壬寅倪文俊復陷武昌漢陽進攻岳州命親王失里門四川左丞沙刺班等分守山東湖廣四川諸路及招諭各起兵者八月戊辰以達識爲江浙左丞相戊寅太白經天雲南死可伐降立平緬宣撫司四川向思勝降改安定州爲軍民安撫司起前左丞相太平爲淮南行省左

丞相總制山東軍駐濟寧立吾者野人乞列迷等處諸軍
萬戶府于哈爾分之地斬黃賊陷宣州禮部尙書致仕汪
澤民死之九月癸未以紐的該平章政事幹鑾爲中書左
丞丁好禮參議省事己丑太白犯太微垣己亥倪文俊圍
岳州改竄脫脫于阿輕乞之地冬十月丁巳立淮南行樞
密院于揚州己未太陰犯壘壁陣帝謂右丞相定住曰敬
天地尊祖宗重事也朕將親祀郊廟務盡誠敬卿等共議
典禮從其簡者行之庚午以襲封衍聖公孔克堅同知太
常禮儀院事其子希學襲封衍聖公癸酉太陰犯軒轅定
郊祀禮以太祖皇帝配上出宮至郊所便服乘馬不設內
外儀仗教坊隊子齋戒七日內散齋四日於別殿致齋三
日二日在大明殿西幄殿一日在郊所丙子立海道防禦

運糧萬戶府于平江黃河水軍萬戶府于小清口十一月

甲申熒惑犯氐庚寅填星犯井壬辰親祀上帝于南郊特

命皇太子爲亞獻丞相定住爲終獻

通攷云帝每歲致祭社稷自正十五年

後廢不舉

甲午復起太不花爲湖廣左丞相荆襄諸軍悉聽節

制給還元奪宣命己亥介休縣桃杏華太陰犯鬼庚戌賊

陷懷慶饒州二路十二月壬子朔熒惑犯房丁巳命中書

參政月倫失不花陳敬伯分省彰德癸亥立忠義忠勤萬

戶府丁武安宿州乙亥帝以天下兵起下詔罪己大赦荅

失拔都魯大敗劉福通於太康遂圍亳州僞宋主韓林兒

遁走安豐立大兵農司于保定河閒武清景薊四處招集

夫丁且耕且守又設兵農千戶所二十四百戶所四十八

鎮撫司四隸之察罕帖木爾與賊戰于河南北屢有功除

中書刑部侍郎哈麻矯殺右丞相脫脫是年太廟惟舉春秋二享

十六年丙申春正月己丑太陰犯昴庚戌哈麻欲立太子爲帝奉帝爲太上皇語泄與其弟雪雪竝罷以搠思監爲御史大夫薊州雨血地震倪文俊建僞都于漢陽迎徐壽輝據之二月丙申搠思監劾哈麻兄弟罪惡帝欲貸之丞相定住執奏不已詔貶哈麻惠州雪雪肇州比行皆杖死丙寅命翰林國史院太常禮儀院定擬二皇后奇氏三代功臣謚號王爵甲戌詔部院正官各舉材堪守令者一人不拘蒙古色目漢人南人聽中書省酌用己卯遣集賢直學士楊俊民致祭曲阜孔子廟張士誠據平江遂陷湖州松江常州諸路集賢待制孫撝死之

時搠思監詔至平江招諭遂遇害三月

辛巳徐壽輝寇襄陽戊子命宣讓王帖木爾不花威順王

寬徹普化以兵鎮懷慶路朱元璋兵取集慶路南臺御史

大夫福壽死之

名山藏云平章阿魯灰參政百家奴集慶路達魯花赤達尼達思皆戰死丙申

倪文俊陷澧州常德路丁酉立行樞密院于杭州命達識

兼知行院事省院官竝聽調遣朱元璋兵取鎮江戊申方

國珍復降授海道漕運萬戶國璋衢州路總管是月有兩

日相盪夏四月辛亥命搠思監爲左丞相普化爲御史大

夫丁卯以知樞密事實理門分院濟寧五月壬辰太白犯

鬼甲午太陰入斗丁酉犯壘壁陣六月甲寅加苗軍帥楊

完者爲江浙參政以其兵禦張士誠守嘉興乙丑朱元璋

兵取廣德路秋七月己卯朔朱元璋自稱吳國公改集慶

路曰應天府建官屬丁酉太陰犯壘壁陣張士誠遣兵陷

杭州江浙平章左荅納失里戰死丞相達識遁入富陽苗
帥楊完者及萬戶普賢奴擊敗之復其城八月丙辰奉元
路判官王淵以義兵復商州升淵同知宣慰司事丁卯太
陰犯昴庚午倪文俊陷衡州路元帥甄崇福戰死甲戌彗
星見張宿色青白彗指西南長尺餘至十二月戊午朔始
滅是月黃河決山東大水九月庚辰汝潁賊李武崔德破
潼關參政述律杰戰死壬午豫王阿剌忒納失里同知樞
密事定住引兵復潼關河南平章伯家奴以兵守之戊戌
賊陷陝號二州命太尉納麟復爲南臺御史大夫遷行臺
治紹興輟耕錄云集慶失守行臺移置紹興前御史大夫
溪則有縣尹陳文昭餘姚則有同知圖堅在城則有錄事
司達魯花赤邁里古思皆總制團結義民者安安以三人
爲不易制乃給圖堅至拘留寶林寺夜率臺軍禽殺之從
而方國珍亦執文昭沈之海獨存邁里古思一人及拜住

哥代納麟爲大夫又不察罕帖木爾復陝號二州襲敗賊

能容擣般于其私第

兵于平陸以功授僉河南行樞密院事冬十月丁未大名路有星如火從東南流芒尾如曳彗墮地有聲炎焰蓬勃久之化爲石青黑光瑩形如狗頭其斷處若新割者命藏于庫壬申太陰犯井淮安城陷淮東道廉訪使褚不華死之十一月丙戌以老的沙荅里麻失竝爲詹事丁亥流星大如酒杯色青白尾跡長五尺餘光明燭地起自東北東南行沒于近濁有聲如雷壬辰太陰犯井十二月倪文俊陷岳州路殺威順王子解帖木爾湖廣參政耶先帖木爾與左江義兵萬戶鄧祖勝合兵復衡州西臺御史李尙綱上關中形勝急論十二事命大司農司屯種雄霸二州以給京師號京糧是年太廟惟舉春享自後四祭皆闕

十七年丁酉春正月丙子朔日食辛卯命山東分省團結義兵仍令各路達魯花赤提調聽宣慰使節制二月壬子李武崔德犯七盤藍田命察罕帖木爾守潼關調河南兵聽豫王阿剌忒納失里及定住同進討之癸丑太陰犯五車戊辰知樞密事脫脫復邳州調客省使撒爾荅溫等攻黃河南岸賊大破之壬申劉福通遣其黨毛貴陷膠州僉樞密院事脫歡死之甲戌倪文俊陷峽州李武崔德陷商州三輔震恐察罕帖木爾與李思齊以兵自陝號來援殺獲無算論功以察罕爲陝西左丞思齊爲四川左丞加荅失拔都魯太尉四川左丞相三月乙亥朔義兵萬戶賽甫丁阿迷里丁叛據泉州庚辰毛貴陷萊州宣慰副使釋嘉訥死之壬午朱元璋兵取寧國路甲申太陰犯鬼壬辰歲

星犯壘壁陣甲午毛貴陷益都益王買奴遁自是山東郡邑皆陷丁酉毛貴陷濱州及莒州戊戌以悟良哈台幹樂平章政事夏五月戊寅平章赤老溫帖木爾復武安州等三十餘城丙申命搠思監爲右丞相太平復爲左丞相詔免天下今年稅糧之半六月甲辰朔以帖里老的沙竝爲御史大夫罷陝西行樞密院庚申朱元璋兵取江陰州及徽州路癸酉有龍鬪于溫州路樂清江颶風大作所至火光如毬死者萬餘人是月劉福通犯汴梁其黨分三道關先生潘破頭王士誠等寇晉冀白不信大刀敖李喜喜等趨關中毛貴據山東其勢益振秋七月癸未太白犯鬼甲申太陰犯斗丁亥填星犯鬼己丑鎮守黃河義兵萬戶田豐叛陷濟寧分院實理門遁義兵萬戶孟本周攻之豐敗

走本周還守濟寧甲午以完者帖木爾爲中書右丞俺普
參知政事立四方獻言詳定司歸德知府林茂萬戶時公
權叛以城降賊曹州亦陷是月大都晝霧自旦至午昏冥
不辨人物者旬有五日八月癸卯填星犯鬼太白犯軒轅
癸丑劉福通兵陷大名遂自曹濮犯衛輝荅失拔都魯遣
子孛羅帖木爾分兵擊走之甲子太陰犯五車乙丑以方
國珍爲江浙參政海道運糧萬戶如故朱元璋兵取揚州
張士誠爲書詣江浙請降達識遣參政周伯琦至平江撫
之詔以士誠爲太尉士誠畱伯琦不遣九月丙子以老的
沙平章政事兼兀良海牙指揮使甲午澤州陵川陷縣尹
張輔死之戊戌太不花復大名路并所屬郡縣辛丑加紐
的該太尉總諸軍守東昌倪文俊謀殺其主徐壽輝不果

自漢陽奔黃州爲壽輝部將陳友諒所殺友諒并其軍自稱平章閏月癸卯有飛星如孟青色光燭地尾長尺餘起自王良没于句陳丙午太陰犯斗庚申犯井乙丑潞州陷冬十月乙亥熒惑犯氐甲申太陰掩昴劉福通黨略興元遂圍鳳翔察罕帖木爾李思齊擊破之賊走入蜀荅失拔都魯討曹州賊軍敗知樞密院事荅里麻失里死之靜江路山崩地陷十一月辛丑汾州桃杏華戊午以荅蘭平章政事李獻爲中書左丞八都麻失里爲右丞卜顏帖木爾哈剌那海崔敬陳敬伯竝參知政事十二月庚午熒惑犯天江戊寅太白犯歲星甲申太陰犯鬼丁亥歲星犯壘壁陣庚寅太白犯壘壁陣癸巳太陰犯心丁酉象山縣鵝鼻山崩己亥流星如金星大尾長三尺餘起自太陰近東而

沒化爲青白氣荅失拔都魯卒于軍是歲趙均用彭早住同據淮安趙僭稱永義王彭僭稱魯淮王義兵千戶余寶殺知樞密院事寶童叛降于毛貴據棣州

十八年戊戌春正月辛丑填星犯鬼丙午太陰犯昴陳友諒陷安慶淮南行省右丞余闕死之庚戌朱元璋兵取婺源州及建德路乙丑大風起自西北仆益都土門萬歲碑丙寅田豐陷東平路命荅失拔都魯子孛羅帖木爾爲河南行省平章領其父軍分命察罕帖木爾屯陝西李思齊屯鳳翔二月己巳朔立團結西山寨大小十一處設萬夫千夫百夫長分守要害毛貴陷青滄州進據長蘆鎮分戶部寶鈔庫等官于陝西就近造鈔以給軍癸酉毛貴陷濟南山東宣慰使董搏霄死之

時搏霄已拜河南右丞未之任

乙亥填星犯

鬼辛巳命太不花爲中書右丞相總兵山東壬午田豐復陷濟寧紐的該棄東昌走丁亥察罕帖木爾遣兵復涇州平涼遂保鞏昌庚寅王士誠自盩厔都犯懷慶丁酉興元陷三月己亥朔日色如血庚子毛貴陷般陽路辛丑大同路夜黑氣蔽西方聲如雷少頃東北方有雲如火交射中天已而火光遍地空中作兵甲聲癸卯王士誠陷晉寧路總管杜賽因不花死之甲辰察罕帖木爾遣兵復晉寧庚戌毛貴由河間趨直沽遂破薊州掠柳林樞密副使達國珍戰死徵四方兵入衛同知樞密事劉哈刺不花由彰德以兵拒戰于柳林貴眾潰仍走濟南丙辰冀寧路及大同諸縣陷夏四月甲戌陳友諒據江西省治壬午田豐由盩厔都掠廣平退保東昌元帥方脫脫以兵復廣平辛卯太白犯

鬼甲午陳友諒遣王奉國陷瑞州是月察罕帖木爾李思齊會宣慰使張良弼等兵討李喜喜于鞏昌喜喜敗入蜀察罕駐清湫思齊駐斜坡良弼駐秦州郎中郭擇善駐崇信宣慰同知拜帖木爾駐通渭平章定住駐臨洮各自除官屬徵納軍需旣而思齊良弼襲殺拜帖木爾分其兵五月戊戌朔察罕帖木爾遣將復冀寧自以劉尙質爲冀寧路總管李思齊擅殺郭擇善庚子劉福通攻汴梁守將竹貞棄城遁福通入城自安豐迎僞主韓林兒居之以爲都壬寅太白犯填星庚戌陳友諒陷吉安路壬子太陰犯斗癸丑御史七十等糾右丞相太不花緩師拒命詔削其官爵安置蓋州命知行院事悟良哈台代之節制河北軍河南平章周全節制河南軍辛酉陳友諒兵陷撫州六月戊

辰朔日食太不花伏誅察罕帖木爾調部將虎林赤關保同守潞州授察罕帖木爾陝西行省平章便宜行事乙酉命左丞相太平督諸軍守京城秋七月丁酉朔周全據懷慶叛降於劉福通殺守將伯帖木爾盡驅懷慶民渡河入汴梁丁未太陰犯斗戊申太白晝見己未劉福通遣周全引兵攻洛陽守將登城以大義責全全媿謝退兵劉福通殺之八月壬申太陰掩心甲申掩昴陳友諒兵陷建昌路義兵萬戶王信以滕州叛降於毛貴庚寅以老的沙爲御史大夫九月丁酉朔襄封唐劉蕡爲文節昌平侯劉福通分兵踰太行焚上黨破遼州大掠興和塞外諸郡乙丑陳友諒陷贛州參政全普庵撒里及總管哈海赤死之冬十月己卯太陰犯昴壬午監察御史燕赤不花劾右丞相搠

思監奸貪誤國詔收其印綬以紐的該爲左丞相十一月

乙未朔田豐陷順德路陳友諒陷汀州丙午太陰犯昴太

白犯房辛酉太陰掩心十二月乙丑朔日食癸酉劉福通

黨陷上都焚宮闕轉略遼陽遂至高麗上都爲累朝巡幸之所至是不復時

巡戊寅太白經天庚辰察罕帖木爾遣樞密院判瑣住進

兵遼陽癸未太白經天甲申朱元璋兵取蘭溪州及婺州

路達魯花赤僧住廉訪使楊惠死之戊子太陰犯房是歲

大饑疫兩河山東斗米金一斤民流入京師死者二十餘

萬人宦者朴不花請市地收瘞之

十九年己亥春正月甲午朔陳友諒遣將王奉國寇信州

路江東廉訪副使伯顏不花的斤往救死之辛丑太陰犯

昴乙巳以朵爾只班平章政事丙午遼陽行省陷懿州路

總管呂震死之察罕帖木爾遣樞密院判陳秉直八不沙將兵二萬守冀寧癸丑流星大如酒杯有聲如雷二月辛巳叛將梁炳攻辰州參政和尚擊敗之甲申賊由飛狐靈丘犯蔚州庚寅詔孛羅帖木爾移鎮大同捍蔽京師復置大都督兵農司并分司十道專督屯糧卽以孛羅領之保定河間不勝其擾三月癸巳朔陳友諒略衢州復分兵陷襄陽庚戌太陰犯房壬戌定科舉流寓人名額蒙古色目南人各十五名漢人二十名夏四月癸亥朔毛貴爲趙均用所殺帝以天下多故卻天壽節朝賀禮太子率羣臣再三奏請帝曰朕關於修省致萬姓塗炭今復朝賀燕集是重朕不德也俟天下安寧行之未晚卒不聽己丑賊陷寧夏遂略靈武等處五月

通攷云丁亥朔日食本紀作壬辰朔不言日食

丙申熒惑

犯鬼丁酉皇太子請巡北邊綏撫軍民御史臺上疏固畱
帝從之丙午太陰犯天江丁未犯斗以八月鄉試河南舉
人及避兵儒士不拘籍貫依河南省元額就陝州置貢院
應試秋七月壬辰朔黜擿思監爲遼陽左丞相丁酉太白
犯上將甲辰犯右執法己酉犯左執法命國王囊加帶等
統軍征遼陽丙辰毛貴黨續繼祖自遼陽入益都執趙均
用殺之八月辛酉朔察罕帖木爾大發秦晉軍攻汴梁破
之劉福通奉僞主韓林兒復走安豐詔察罕帖木爾爲河
南行省平章兼同知樞密院西臺中丞依前便宜行事九
月癸巳禁軍人私殺牛馬以察罕海子宣慰司地隸資政
院有司不得差占

其地在世祖時屬忙哥台太子四千戶今從二皇后奇氏請故改隸之

丙午夜白虹貫天甲寅太白犯天江朱元璋兵取衢處二州

遣尙書伯顏帖木爾曹履亨以御酒龍衣賜張士誠徵海

運糧

時中原既亂江南海漕久不至京師銀一錠易米八斗民大饑至是河南始通故往徵之

冬十月

庚申朔詔京師諸門築甕城造弔橋以方國珍爲江浙平

章壬申太白犯斗辛巳流星大如桃陳友諒兵陷杉關十

二月戊辰太白犯壘壁陣時皇太子欲撫軍憾左丞相太

平不從殺中書左丞成遵參知政事趙中

以太平舉用之人誣以賊罪下

獄杖殺之陳友諒以江州爲都迎僞主徐壽輝居之自稱漢王

是歲山東河南關中飛蝗蔽天人馬不能行落溝塹盡滿

綱目大都杜鵑報耕錄云至正乙亥十二月金陵游軍斬關突至杭城閉城三月餘城中米價一斗直二十五緡

數日米盡糟穢亦與常日米價等又數日糟穢盡乃以油車家穢餅擣屑啖之餓死者十六七

二十年庚子春正月己丑朔改鞏縣爲軍州萬戶府招民

屯種己亥太陰犯井癸卯太寧路陷壬子以絆住馬平章

政事危素參知政事丙辰五色雲見二月戊午朔左丞相
太平罷尋爲上都留守三月戊子朔田豐陷保定彗星見
東方乙巳冀寧陷壬子復以搆思監爲右丞相夏四月丁
卯太陰犯明堂癸酉犯東咸僉行樞密院事張居敬復興
中州五月丁亥朔日食陳友諒殺其僞主徐壽輝自稱帝
國號漢改元大義已而回駐江州遣兵陷辰州壬寅太陰
犯建星張士誠海運糧十一萬石至京師六月己丑察罕
帖木爾與孛羅帖木爾爭晉冀互相讎殺帝下詔令各守
信地毋得越境侵犯癸巳太白犯井戊戌太陰犯建星秋
七月辛酉孛羅帖木爾敗王士誠於臺州乙丑太陰犯井
乙亥詔孛羅帖木爾統領達達漢軍仍便宜行事八月戊
子命孛羅帖木爾守石嶺關以北察罕帖木爾守石嶺關

以南

關在大原府東

辛卯太陰犯天江壬辰填星犯太微乙未永

平路陷甲辰太陰犯井詔在外權攝官專務殘虐百姓今後非朝命不得之任九月乙卯朔孛羅帖木爾調兵白石嶺關直抵冀寧圍其城三日退屯交城察罕帖木爾調參政閻奉先引兵與戰相持各不下帝遣參政耶先不花前往和解壬戌賊陷孟州由趙州攻真定復犯上都右丞忙哥帖木爾與戰敗績冬十月甲申朔甘露降于國子監大成殿前柏木以張良弼爲湖廣參政規取荆襄戊子熒惑犯井詔孛羅帖木爾守冀寧遣軍倍道至守者不納己亥察罕帖木爾遣陳秉直瑣住等以兵攻孛羅之軍于冀寧與其部將脫列伯戰敗之時帝有旨以冀寧界孛羅察罕不從渡河就屯澤潞拒之十一月甲寅朔黃河清三日詔

太廟影堂祭祀乃子孫報本重事近者兵興歲歉品物不能豐備累朝四祭減爲春秋二祭今宜復四祭究不果行二十一年辛丑春正月癸丑朔詔赦天下遣使諭李羅帖木爾察罕帖木爾各罷兵還鎮時李羅縱兵掠冀寧察庚申太陰犯歲星丁卯李思齊進兵平伏羌等縣癸酉石州大風拔木六畜俱鳴民間槍刀生火焰抹之卽無搖之則有二月癸未朔填星退犯太微垣甲申同僉樞密事迭里帖木爾復永平灤州壬寅太陰犯天江廣東廉訪使八撒刺不花殺本省廉訪使完者篤副使李思誠僉事迭麥赤以兵據廣州時八撒刺不花久任廣東專權自恣朝廷患御史八撒刺不乃以完者篤代其任而除八撒刺南臺侍受命遂激成變三月丙辰太陰犯井庚辰熒惑犯鬼張士誠海運糧十萬石至京師李羅帖木爾罷兵還遣脫列伯

等引兵據延安謀入陝詔張良弼出南山義谷駐藍田聽

察罕帖木爾節制良弼陰結陝西平章定住俟丞相帖里

帖木爾調遣營于鹿臺察罕銜之夏四月辛巳朔日食耕輟

錄云至正辛丑四月朔日未沒忽然無光天昏黑如夜星斗燦然久之方復舊天再明星斗亦隱又少時日乃沒

調張良弼爲陝西參政察罕遣其子副詹事擴廓貞糧至

京師皇太子親與定約急圖出師五月癸丑明玉珍陷嘉

定等路壬戌太陰犯房癸酉太白犯軒轅甲戌熒惑犯太

白乙亥李思齊受李武崔德等降六月乙未熒惑歲星太

白聚于翼丙申察罕帖木爾總兵討山東發晉軍下井陘

出邯鄲過磁相懷衛踰白馬津水陸竝進戊戌太陰犯雲

雨甲辰太白晝見秋七月通攷云辛酉朔日食辛亥察罕帖木爾平

東昌復冠州己巳忻州西北及大同路北有赤氣蔽天如

血八月乙酉察罕帖木爾遣擴廓閻思孝等討田豐直擣東平大破之豐降令爲前鋒從大軍東討棣州俞寶東平王士誠東昌楊誠濟南劉珪等皆降魯地悉定引兵圍益都陽翟王阿魯輝謀逆伏誅冬十月癸巳絳州有赤氣見北方如火命察罕帖木爾爲中書平章政事兼知河南山東行院事陝西行臺中丞察罕調降將劉珪等守河南十一月庚戌太陰犯建星癸亥犯井壬申犯氐黃河自平陸三門磧下至孟津五百里皆清凡七日

命祕書少監程徐祀之

察罕

帖木爾李思齊遣兵圍鹿臺攻張良弼詔各還信地兵乃解是歲京師屯田成收糧四十萬石賜司農丞胡秉彝上尊金幣旌其功餘各賜鈔有差

二十二年壬寅春正月戊申朔太白犯建星甲寅分命李

元史卷十四

本紀

哭

思齊討四川張良弼平襄漢思齊退保鳳翔不行

時思齊附察罕

而良弼附李羅兩軍不和故有是命

乙亥填星退犯左執法二月己卯太白

犯壘壁陣乙酉彗星見于危光芒長丈餘色青白丁酉犯

離宮西星至月終光芒長二丈餘三月戊申彗星不見星

形惟有白氣形曲竟天西指掃大角壬子彗星行過太陽

前惟有星形無芒在昴宿至戊午始滅甲寅明玉珍陷雲

南省治陝西參政車里帖木爾擊敗之禽其弟明二己未

命孛羅帖木爾爲中書平章政事加太尉李思齊復遣兵

攻張良弼於武功良弼伏兵大破之諭良弼聽孛羅節制

夏四月丙子朔長星見其形如練長數十丈在虛危之間

四十餘日乃滅丁亥熒惑離太陽三十九度不見當出不

出五月乙巳朔閩賊賽甫丁據福州路平章燕只不花擊

敗之餘眾航海還據泉州福建參政陳有定

一作復汀州友定

路辛酉太陰犯建星辛未明玉珍據成都自稱隴蜀王張士誠海運糧十三萬石至京師六月辛巳彗星見紫微垣光芒長尺餘東南指西南行戊子彗星光芒掃上宰降賊田豐王士誠刺殺察罕帖木爾走入益都詔以其子擴廓襲父職總其軍仍諭將士力圖報復以伸大義秋七月乙卯彗星滅跡丙辰熒惑見西方須臾成白氣如長蛇光炯有文橫亙中天移時乃滅河決范陽縣八月癸巳太白犯畢九月癸卯朔劉福通以兵援田豐至火星埤擴廓邀擊大破之丁未太白犯亢己酉太陰犯斗辛亥歲星犯軒轅丙寅熒惑犯鬼己巳有流星如酒杯色青白光明燭地冬十月壬申朔命江西平章朵列不花分省廣州執叛臣八

撒剌不花殺之甲戌孛羅帖木爾南侵擴廓分地據真定路己卯太陰犯牛丁亥辰星犯亢戊子太陰犯畢十一月乙巳擴廓拔詔都田豐王士誠伏誅擴廓取其心以祭父庚戌擴廓遣關保復莒州山東悉平詔加擴廓太尉便宜行事癸亥四川賊陷青川十二月壬辰太陰犯角庚子以佛家奴爲御史大夫加封唐撫州刺史南庭王危全諷爲南庭忠烈靈惠王是歲黃河自河東清者千餘里帝聞之不樂曰黃河清聖人生當有代朕者羣臣曰今太子生子陛下聖孫卽其應也帝笑而頷之

二十三年癸卯春正月壬寅朔明玉珍僭稱帝于成都國號夏紀元天統庚申歲星犯軒轅二月戊戌太白晝見庚子擴廓自益都領兵還河南畱瑣住守之張士誠遣將呂

珍入安豐殺劉福通據其城三月辛丑朔彗星見東方經月乃滅命中書平章愛不花分省冀寧擴廓遣兵據之丙辰太白犯氏壬戌大同路夜有赤氣亙天中侵北斗立廣

西行中書省以廉訪使耶爾吉尼爲本省平章

時南方郡縣皆陷惟

耶爾吉尼獨保廣西者十五年

夏四月辛丑熒惑犯歲星庚申歲星犯軒

轅孛羅帖木爾與李思齊構兵不已擴廓遣貊高等以兵擊張良弼詔孛羅速進兵討襄漢五月己巳朔張士誠海運糧十三萬石至京師壬午太白晝見乙未熒惑犯右執法六月戊戌朔孛羅帖木爾遣方脫脫迎匡福于彰德擴廓遣兵追之敗還匡福遂據保定己亥擴廓部將台盧等駐兵藍田七盤李思齊圍興平據盤屋孛羅帖木爾既奉詔討襄漢道阻不得下戊申孛羅帖木爾遣竹貞等入陝

西據省治擴廓遣部將貊高與李思齊合攻之竹貞出降
庚戌星隕于濟南龍山入地五尺乙卯太白犯井丁巳絳
州有白虹二道衝斗牛庚申平陽路有白氣三道貫北極
北斗天漢壬戌太白晝見夜犯井秋七月戊辰朔以袁宏
馬良參知政事乙酉太白晝見有星墜于慶元路西北聲
如雷光數十丈八月丁酉朔倭寇蓬州守將劉暹擊走之
壬寅太白犯軒轅乙巳太陰犯建星丁未太白犯軒轅己
酉太白晝見丙辰太陰犯畢沂州有赤氣亙天中有白色
如蛇形徐徐西行至夜分乃滅己未太白晝見辛酉太白
犯歲星乙丑犯右執法偽漢陳友諒與朱元璋大戰鄱陽
湖敗死其子理自立仍據武昌爲都改元德壽九月辛未
太白犯左執法乙亥歲星犯右執法丁丑辰星犯填星丁

亥太白犯填星辰星犯亢張士誠自稱吳王卽平江治宮
室遣侍郎博羅帖木爾再徵糧士誠不應東南海運遂絕
冬十月丙申朔山東赤氣千里癸卯太白犯氏二皇后奇
氏惡丞相太平令監察御史米只爾海牙劾之本傳作御史大夫皆
化詔安置太平于吐蕃未至逼令自殺戊午太白犯房擴
廓遣僉院事任亮復安陸府孛羅帖木爾遣兵攻冀寧至
石嶺關擴廓破走之禽其將烏馬爾殷興祖孛羅軍由是
不振十一月癸未太陰犯軒轅歲星犯右執法詔復故丞
相脫脫所授宣命是歲御史大夫老的沙與知樞密院事
圖堅帖木爾得罪于皇太子奔大同孛羅帖木爾匿之軍
中

二十四年甲辰春正月戊寅太白犯軒轅庚辰保德州民

元史卷十四

本紀

四

家產豬一頭兩身朱元璋改稱吳王自將伐漢僞漢主陳理降悉有湖廣江西之地二月壬子歲星犯左執法癸丑太陰犯西咸池三月辛卯時皇太子惡孛羅帖木爾匿老的沙圖堅帖木爾乃以帝詔削孛羅官爵奪其兵孛羅拒命不受夏四月甲午朔日食既又以帝詔命擴廓討孛羅帖木爾孛羅知非出帝意皆右丞相搠思監宦者朴不花所爲遂令圖堅帖木爾舉兵犯闕入居庸關知院事耶速魯事不蘭奚迎戰敗績甲辰皇太子率侍衛兵出古北口東趨興松乙巳圖堅帖木爾兵至清河列營都城大震使達達國師至其軍問故以必得搠思監朴不花爲辭帝不得已執與之丁未詔復孛羅帖木爾官爵總兵如故以耶速爲左丞相庚戌圖堅帖木爾陳兵自健德門入覲帝于

延春閣慟哭請罪帝宴賚之加字羅帖木爾太保仍守大
同圖堅帖木爾進中書平章政事辛亥圖堅帖木爾請還
軍皇太子至路兒嶺詔追回宮癸丑太白犯井五月戊辰
皇太子促擴廓討孛羅帖木爾屯兵冀寧分三道東道以
白鎖住領兵三萬守京師中道以貊高竹貞領兵四萬西
道以關保領兵五萬合擊之關保等兵逼大同孛羅畱兵
拒守而自率兵與圖堅帖木爾老的沙復大舉向闕甲戌
太白犯鬼乙亥歲星犯左執法六月癸卯三星晝見白氣
橫突其中甲辰河南府有大流星向南方光如晝丁未大
星隕照夜如晝及旦黑氣晦暗如夜甲寅白鎖住以兵至
京師固請皇太子西行丁巳太白犯右執法保德州黃龍
見井中秋七月癸亥太白歲星合于翼甲子歲星犯左執

法丙戌李羅帖木爾前軍入居庸關皇太子率諸軍禦于
清河耶速軍于昌平軍士不戰而潰散皇太子馳還都城
白鎖住引兵扈之星夜取道雄霸河閒往冀寧戊子李羅
帖木爾駐兵健德門與圖堅帖木爾老的沙入見帝于宣
文閣訴其非罪皆泣帝亦泣賜宴如初庚寅命李羅帖木
爾爲左丞相老的沙平章政事圖堅帖木爾爲御史大夫
耶速知樞密院事帝曰李羅擴廓俱朕股肱視同心膂自
今各釋宿忿弼成大勳八月壬辰朔日食乙未熒惑犯鬼
乙巳皇太子兵至冀寧乙卯張士誠逐達識以其弟士信
代爲江浙左丞相南臺御史大夫普化帖木爾不從死之
達識亦仰藥死李羅帖木爾旣當國請誅狎臣罷三宮不
急造作汰宦官減錢糧禁西番僧作好事數遣使請皇太

子還宮使至大原皇太子拘留不報九月辛酉朔宦官思
龍宜潛送宮女伯忽都出順承門達冀寧行帳乙丑太白
晝見癸酉夜西北有紅光至東而散甲申太陰犯軒轅冬
十月丙午太陰犯畢己酉犯井己未詔諭皇太子還京師
命耶速老的沙分道總兵十二月乙卯太陰犯太白

二十五年乙巳春正月癸亥封李思齊爲許國公丙寅太

白晝見甲戌太白犯建星二月辛丑汴梁路見日旁有一

月一星

輟耕錄云至正乙巳遣翰林應奉李國鳳抵汴城望祭嵩嶽二月十三日仰視日旁一月一星如初

弦者又十日雨木冰狀如樓閣人物爲獸卉木俱備高林大樹珠葆羽幢彌望不絕凡五日始解又十日復冰自汴至中澤皆然丙午太陰犯填星三月庚申朔皇太子在冀寧下

令軍中曰字羅帖木爾襲據京師余既受命總督天下諸
軍恭行顯罰少保平章擴廓躬勒將士分道進討諸王駙

馬及陝西平章李思齊等各統軍馬尙其奮義戮力剋期
恢復丙寅孛羅帖木爾聞皇太子討己幽置二皇后于諸
色總管府丁卯以火尼赤別帖木爾竝爲御史大夫戊辰
太白犯壘壁陣夏四月庚寅孛羅帖木爾脅二皇后令還
宮取印章僞爲后書遺皇太子遣內侍完者圖持往冀寧
復出幽之乙巳關保等兵入大同壬子熒惑犯靈臺五月
辛酉熒惑犯太微垣甲子京師雨鼂長尺許或言于帝曰
龍絲也命拾而祀之六月戊子以黎安道參知政事乙巳
二皇后還宮乙卯皇太子加李思齊邢國公秋七月丁丑
填星歲星熒惑聚于角亢己卯太陰犯畢乙酉孛羅帖木
爾伏誅圖堅帖木爾老的沙北遁丙戌遣使幽孛羅首往
冀寧卽召皇太子還其黨黎安道方脫脫雷一聲皆棄市

河決小流口達于清河八月丁亥朔京城門閉者三日竹
貞豹高命軍士緣城而上碎平則門鍵大掠都市乙未太
陰犯建星己亥太白犯壘壁陣癸卯復命皇太子分調將
帥戡定未復郡邑承制用人并準正授丁未皇后弘吉刺
氏崩壬子以洪寶寶貼古思不花捏烈圖竝平章政事擴
廓扈從皇太子至大都九月丁丑太陰犯井壬午命伯撒
里爲太師右丞相擴廓爲太尉左丞相錄軍國重事以方
國珍爲淮南左丞相分省慶元冬十月辛卯熒惑犯天江
壬寅以哈刺章知樞密院事丁未益王渾都帖木爾禽老
的沙誅之圖堅帖木爾走八爾思之地命嶺北左丞相山
僧追討之戊申以圖魯爲御史大夫己酉熒惑犯斗太陰
犯右執法庚戌犯太微垣閏月庚申詔張良弼俞寶孔興

等悉聽擴廓調遣戊辰太白辰星熒惑聚于斗太陰犯畢
辛未封擴廓河南王以代皇太子親征總制關陝晉冀山
東迤南一應軍馬聽便宜行事壬申太白犯歲星辛巳以
脫脫木爾爲中書右丞達寶參知政事十一月己丑太白
犯熒惑太陰犯壘壁陣丙申犯畢癸卯犯太微垣十二月
乙卯立二皇后奇氏爲皇后改賜肅良合氏癸亥太陰犯
畢庚午歲星掩房辛未太陰犯右執法圖堅帖木爾伏誅
是歲遣侍郎滿尙賓等至鳳翔持詔諭李思齊開通川蜀
道路思齊方兵爭不奉詔畱尙賓等不還

二十六年丙午春正月己酉命沙藍荅里爲左丞相孛羅
沙脫脫不花竝爲御史大夫完者木知樞密院事壬子增
燕南河南山東陝西河東舉人會試者額進士及第以下

遞升官一階二月癸丑朔立河淮水軍元帥府于孟津甲戌以內難平凡經值軍馬之地與免雜泛差徭命擴廓還河南分省部自隨統制各處軍馬收復中原調陝西張良弼兵不應是月黃河北徙自東明曹濮下及濟寧民皆被害三月丁亥白虹五道亙天其第三道貫日又有氣橫貫東南良久甲午擴廓遣關保等西攻張良弼於鹿臺李思齊脫列伯孔興等與良弼連兵拒之僞夏主明玉珍死夏六月壬子朔介休縣地震平遙縣大雨雹山陰縣臥龍山裂秋七月辛巳朔日食徐溝縣地震石州大星如斗自西南而落甲午太白經天擴廓分兵屯河中遣關保虎林赤合兵渡河約李思齊共攻張良弼思齊仍與良弼合連兵拒守丙午太白經天八月戊寅以李國鳳爲中書左丞授

陳有定爲福建行省平章九月丙戌加方國珍爲江浙左丞相其弟國瑛國珉姪明善竝爲行省平章辛丑李星見東北方冬十月甲子擴廓遣其弟脫因帖木爾及貊高完哲等駐兵濟南控制山東十二月庚午蒲城洛水和順崖崩是歲吳王朱元璋兵取淮安高郵徐邳潁泗及湖杭二州紹興嘉興諸路皆張士誠竊據者僞宋主韓林兒死二十七年丁未春正月乙未絳州天鼓鳴聲如戰鬪李思齊張良弼脫列伯會于含元殿基眾推思齊爲盟主同拒擴廓二月庚申以月魯不花月魯帖木爾竝爲御史大夫三月丁丑朔萊州大風海鳥至其翅如席庚子京師大風飛沙揚礫白日昏暗夏五月丙子朔白氣二道亙天大同隕霜殺麥乙酉以完者帖木爾爲右丞相俺督平章政事

辛丑擴廓定擬所屬官二千六百一十員詔從其請李思齊遣張良弼部將郭謙守黃連寨虎林赤竹貞商鬲引兵攻之不克思齊遂據長安六月丙午朔日食晝晦丁巳皇太子寢殿後新甃井中有龍出火焰爍人宮人驚懾仆地長慶寺有龍纏繞槐樹飛去樹皮皆剝丁卯沂州山崩秋七月丁酉絳州星隕光耀如晝李思齊遣將許國佐會張良弼脫列伯兵屯華陰又遣將鄭應祥守陝西自還鳳翔龍見於臨朐龍山大石起立八月丙午再命皇太子總制天下兵馬詔擴廓領本軍自潼關以東肅清江淮李思齊自鳳翔以西進取川蜀以少保圖魯爲陝西行省左丞相總本部及張良弼孔興脫列伯等各軍進取襄樊山東行省平章王信以本軍固守沂州別聽調遣詔書雖下而皇

太子不果行擴廓亦不奉命于是其部將貊高關保皆叛殺衛輝彰德守禦官上言擴廓不遵君命無人臣禮臣等不能俛首聽命詔削擴廓官罷其兵柄就命貊高討之壬子仍令皇太子立大撫軍院以右丞相完者帖木爾翰林承旨荅爾麻平章政事完者帖木爾竝知撫軍院事九月甲戌朔命丞相耶速分省山東沙藍荅里分省大同丁丑以兵興迤南供億繁重真定河南陝西山東冀寧諸處與免民間今年田租之半其餘雜泛一切住罷吳王朱元璋取平江路執張士誠以歸士誠自縊死冬十月甲辰朔命耶速會貊高攻擴廓于真定不克壬子詔落擴廓太傅左丞相及兼領諸職仍前河南王其帳前諸軍命白瑣住虎林赤統之河南諸軍李克彝統之山東諸軍耶速統之山

西諸軍沙藍荅里統之河北諸軍貂高統之關保仍統本部軍如故擴廓退軍澤州甲寅以火里赤丁好禮竝平章政事十一月壬午吳王朱元璋兵取沂州平章王信遁癸未取慶元路方國珍迎降分兵由海道入福州取邵武建寧延平諸路執陳有定以歸有定不屈死辛丑益都陷宣慰使普顏不花總管胡濬知樞密院張俊皆死之十二月癸卯朔日食甲子命右丞相耶速等會國公楊誠陳秉直各部軍同守山東詔李思齊爲副總統守關中脫列伯孔興出潼關渡河合勢東行其勤王事思齊等不奉命詔分潼關以西屬思齊東屬擴廓各罷兵還鎮於是關保退屯潞州商畧畱屯潼關

二十八年戊申春正月壬申朔命皇太子敕關保固守晉

寧總統諸軍如擴廓拒命當以大義相裁就便禽擊辛巳
詔諭擴廓曰比者耶速上奏卿以書陳情深白悔悟及省
來意良用惻然朕視卿猶子卿何惑於愴言不體朕心墮
其先業卿今自能悔固朕所望其思昔日委任肅清江淮
之意卽將冀寧真定諸軍就行統制渡河直擣徐沂以康
靖齊魯則職任之隆當悉還汝衛輝彰德順德皆爲王城
卿無以貊高爲名縱軍侵暴其晉寧諸軍已命關保總制
策應戡定山東將帥各宜悉心庚寅彗星見於昴畢之間
是月吳王朱元璋卽帝位建國號曰大明二月壬寅朔復
削擴廓爵邑命圖魯李思齊等討之癸卯武庫災癸丑明
兵取東昌路守將申榮王輔元死之丙辰擴廓自澤州退
守晉寧關保守澤潞二州與貊高軍合明兵至河南李思

齊張良弼等解兵西還三月庚寅彗星見西北有星流于東北眾小星隨之其聲大震明兵取河南李思齊張良弼會兵駐潼關明兵入潼關思齊奔鳳翔夏五月庚午朔李克彝棄河南城奔陝西推李思齊爲帥駐兵岐山思齊部將虎林赤脫列伯張意等據盤屋商鬻據武功李克彝據岐山任從政據隴州六月庚子朔雷雨中有火自天墜焚大聖壽萬安寺壬戌臨州保德州地震五日止明兵下湖南兩廣悉定秋七月癸酉京城紅氣滿空如火照人自旦至辰方息乙亥京城黑氣起百步內不見人貊高關保以兵攻晉寧閏月己亥朔擴廓禽貊高關保遣其斷事官以聞帝不得已詔貊高關保閒謀構兵卽依軍法誅之辛丑明兵由衛輝彰德取廣平路丁巳詔罷大撫軍院復命

擴廓仍前太傅左丞相統領見部軍馬由中道直抵彰德衛輝右丞相耶速統大軍徑山東道水陸竝進陝西左丞相圖魯率關陝諸軍東出潼關攻取河洛平章李思齊領本部軍南出七盤金商克復汴梁四道進兵犄角勦捕毋分彼此平章俺普瑣住等軍東西布列乘機掃殄遼陽左丞相耶先不花郡王知院厚孫等軍捍禦海口藩屏畿輔以皇太子愛猷識理達臘悉總天下兵馬裁決庶務具如前詔壬戌白虹貫日始罷內府興造甲子擴廓自晉寧退守冀寧明兵至通州知樞密院事卜顏帖木爾力戰死右丞相失列門傳旨奉太廟列室神主竝隨皇太子北行乙丑白虹貫日詔淮王帖木爾不花監國慶童爲左丞相畱守京城丙寅帝御清寧殿集三宮后妃及皇太子并太子

妃同議避兵失列門及知院事黑斯宦者趙伯顏不花等諫不聽伯顏不花慟哭曰天下者世祖之天下陛下當以死守柰何棄之臣等願率軍民及諸怯薛台出城拒戰卒

不聽至夜半開健德門北奔

草木子云至正戊申七月有

之終莫能中俄常遇春等統兵至柳林去京甚近帝召百官會議端明殿及開門忽有二狐自殿上出帝嘆曰宮禁嚴密此物何得至此殆天所以告朕朕其可畱哉遂命北狩八月庚申鴻猷等錄作八月二日申當作

午明兵入京城國亡後一年帝駐于應昌府又一年四月

丙戌始殂壽五十一太尉完者院使觀音奴奉梓宮北歸

五月癸卯明兵襲應昌皇孫買的里八剌及后妃皆被獲

皇太子愛猷識理達臘從數十騎遁明主以帝知順天命

特加號順帝封買的里八剌為崇禮侯

歷代建元攷云順帝駐應昌一年而

祖國人諡曰惠宗太子自立改元宣光凡十一年諡曰昭宗按高麗史云順帝北走駐應昌太子愛猷識理達臘嗣

立徙和林改元宣光稱北元時洪武十年也明年豆叱順帖木爾立北元遣使告高麗繼又以改元天元告則繼順帝而建元者非止宣光矣朔漠圖攷云洪武元年八月明兵取燕都元主攜歷代傳國璽遁出塞三年殂于應昌太子愛猷識理達臘稱帝于漠北傳位于子脫古思帖木爾後為其下耶速迭爾所弑其臣復立坤帖木爾為可汗建文三年殂以鬼力赤為可汗永樂改元屢遣書招諭不服八年車駕親征至斡難河十二年再征追至土刺河二十三年征次殺虎原會部長阿魯台弑其主本雅失里而自立數侵塞上宣德九年為瓦剌部所敗阿魯台走死部落盡離散瓦剌乃遣使入朝獻傳國璽而元始亡

元史卷十四終